

帝紀

魏書
四六

第

二

號

明治二十年一月調査

滋賀縣尋常師範學校圖書

魏書卷四

世祖紀第四下

太平真君元年春正月己酉沮渠無諱圍酒泉辛亥分遣侍臣巡
行州郡觀察風俗問民疾苦壬子無諱誘執弋陽公元潔二月己
巳詔假通直常侍邢穎使於劉義隆發長安五千人浚昆明池三
月酒泉陷夏四月庚辰無諱寇張掖禿髮保周屯于刪丹丙戌詔

撫軍大將軍永昌王健等督諸軍討保周五月辛卯行幸北部乙
巳無諱復圍張掖不克退還丙辰車駕還宮六月丁丑孫生

大赦改年秋七月行幸陰山己丑永昌王健至番禾破保周保周

遁走丙申皇太后竇氏崩于行宮癸丑保周自殺傳首京師八月

甲申無諱降遂大陽公元潔及諸將士九月壬寅車駕還宮冬十

有一月下亥行幸山北十二月車駕還宮是歲州鎮十五萬餘

倉賑恤以河南王曜子羯兒爲河間王後改封略陽王

二年春正月癸卯拜沮渠無諱爲征西大將軍涼州牧酒泉王甲辰行幸溫泉二月壬戌車駕還宮三月辛卯薨惠太后於崑山與戍新興王俊略陽王羯兒有罪並黜爲公辛亥封蠕蠕郁久閭乞列歸爲朔方王沮渠萬年爲張掖王夏四月丁巳劉義隆遣使朝貢庚辰詔鎮南將軍南陽公義眷征酒泉五月辛卯行幸山北秋八月辛亥詔散騎侍郎張偉等使劉義隆行幸河西九月戊戌撫軍大將軍永昌王健薨冬十有一月庚子鎮南將軍奚眷平酒泉獲沮渠天周臧嗟屈德男女四千口十有一月甲戌車駕還宮丙午劉義隆遣使朝貢

三年春正月甲申帝至道壇親受符籙備法駕旗幟盡青語在釋老志二月壬寅北平王長孫頴有罪削爵爲侯夏四月無諱走渡

流沙據鄯善李昌孫寶據敦煌遣使內附三月行幸陰山之北閭

月劉義隆龍驤將軍裴方明梁州刺史劉康祖寇南秦南秦王楊難當敗奔於上邽六月丙戌難當朝於行宮先是起殿於陰山之

北殿始成而難當至因名曰廣德焉秋七月丙寅詔安西將軍建

興公古弼督隴右諸軍及殿中虎賁與武都王楊保宗等從祁山

南入征西將軍淮陽公皮豹子與琅邪王司馬楚之等督關中諸

軍從散關西入俱會仇池鬱林公司馬文思爲征南大將軍進爵

譙王督洛豫諸軍事南趣襄陽征南將軍東安公刁雍東趣廣陵

邀方明歸路冬十月己卯封皇子伏羅爲晉王翰爲秦王譚爲燕

王建爲楚王余爲吳王十有二月辛巳待中太保襄城公盧潛元

薨丁酉車駕還宮李寶遣使朝貢以寶爲鎮西大將軍開府儀同

三司沙州牧封敦煌公

四年春正月己巳征西將軍皮豹子等大破劉義隆將於樂鄉擒其將王奐之王長卿等強玄明辛伯奮棄下辨遁走追斬之盡虜其衆庚午行幸中山二月丙子車駕至于恒山之陽詔有司刊石勒銘是月克仇池三月庚申車駕還宮壬戌烏洛侯國遣使朝貢夏四月武都王楊保宗謀反諸將擒送京師諸氏羌復推保宗弟文德爲主圍仇池丁酉大赦天下己亥行幸陰山五月將軍古弼大破諸氏解仇池圍六月庚寅詔曰朕承天子民憂理萬國欲令百姓家給人足興於禮義而牧守令宰不能助朕宣揚恩德勤恤民隱至乃侵奪其產加以殘虐非所以爲治也今復民貲賦三年其田租歲輸如常牧守之徒各厲精爲治勸課農桑不得妄有徵發有司彈糾勿有所縱癸巳大閱于西郊秋九月辛丑行幸莫南甲辰捨輜重以輕騎襲蠕蠕分軍爲四道事具蠕蠕傳鎮北將軍封沓亡入蠕蠕冬十一月將軍皮豹子等追破劉義隆將於濁水甲子車駕至於朔方詔曰朕承祖宗重光之緒思開洪基恢隆萬世自經營天下平暴除亂埽清不順二十年矣夫陰陽有往復四時有代謝授子任賢所以休息優隆功臣式圖長久蓋古今不易之令典也其令皇太子副理萬機總統百揆諸朕功臣勤勞日久皆當以爵歸第隨時朝請饗宴朕前論道陳謨而已不宜復煩以劇職更舉賢俊以備百官主者明爲科制以稱朕心十二月辛卯車駕至自北伐

五年春正月壬寅皇太子始總百揆侍中中書監宜都王穆壽司徒東郡公崔浩侍中廣平公張黎侍中建興公古弼輔太子以決庶政諸上書者皆稱臣上疏儀與表同戊申詔曰愚民無識信惑妖邪私養師巫挾藏讖記陰陽圖緯方伎之書又沙門之徒假西

戎虛誕生致妖孽非所以壹齊政化布淳德於天下也自王公已下至於庶人有私養沙門師巫及金銀工巧之人在其家者皆遣詣官曹不得容匿限今年二月十五日過期不出師巫沙門身死主人門誅明相宣告咸使聞知庚戌詔曰自頃以來軍國多事未宣文教非所以整齊風俗示軌則於天下也今制自王公已下至於卿士其子息皆詣太學其百工伎巧騶卒子息當習其父兄所業不聽師立學校違者師身死失門誅二月辛未中山王辰等八將以北伐後期斬于都南癸酉驃騎大將軍樂平王丕薨庚辰行幸廬_閣

三月戊戌大會于那南池遣使者四輩使西域甲辰車駕還宮癸丑詔征西大將軍司空上黨王長孫道生鎮統萬夏四月乙亥侍中太宰陽平王杜超爲帳下所殺五月丁酉行幸陰山之北六月北部民殺立義將軍衡陽公莫孤率五千餘落北走追擊于漠南殺其渠帥餘徙居冀相定三州爲營戶西平王吐谷渾慕利延殺其兄子緯代是月緯代弟叱力延等來奔乞師以叱力延爲歸義王秋七月癸卯東雍州刺史沮渠秉謀叛伏誅八月乙丑田于河西壬午詔員外散騎常侍高濟使於劉義隆晉王伏羅督高平涼州諸軍討吐谷渾慕利延九月帝自河西至馬邑觀于崞川己亥車駕還宮丁未行幸漠南冬十月癸未晉王伏羅大破慕利延慕利延走奔白蘭慕利延從弟伏念長史鵜鳩梨部大崇娥等率其部一萬三千落內附十一月劉義隆遣使朝貢十二月粟特國遣使朝貢丙戌車駕還宮

六年春正月辛亥車駕行幸定州引見長老存問之詔兼員外散騎常侍宋愔使劉義隆二月遂西幸上黨觀連理樹於玄氏西至吐京討徙叛胡出配郡縣三月庚申車駕還宮詔諸有疑獄皆付

中書以經義量決是月酒泉公郝溫反於杏城殺守將王幡縣吏
蓋鮮率宗族討溫溫棄城走自殺家屬伏誅夏四月庚辰征西大
將軍高涼王那等討吐谷渾慕利延於陰平白蘭詔秦州刺史天
水公封勅文擊慕利延兄子什歸於枹罕散騎常侍成周公萬度
歸乘傳發涼州以西兵襲鄯善六月壬辰車駕北巡什歸聞軍將
至棄城夜遁秋八月丁亥封勅文入枹罕分徙千家還上邽壬辰
度歸以輕騎至鄯善執其王真達以詣京師帝大悅厚待之車駕
幸陰山之北次于廣德宮詔發天下兵三分取一各當戒嚴以須
後命徙諸種雜人五千餘家於北邊令民北徙畜牧至廣漠以餌
蠕蠕壬寅高涼王那軍到曼頭城慕利延驅其部落西渡流沙那
急追故西秦王慕噴世子被囊迎軍拒戰那擊破之被囊輕騎遁
走中山公杜豐精騎追之度三屯至雪山生擒被囊什歸及熾磐
子成龍送於京師慕利延遂西入于闐國九月盧水胡蓋吳聚眾
反於杏城冬十月戊子長安鎮副將元紇率眾討之爲吳所殺吳
黨遂盛民皆渡渭奔南山於是詔發高平勅勒騎赴長安詔將軍
叔孫拔乘傳領攝井秦雍兵屯渭北十有一月高涼王那振旅還
京師己未遣那及殿中尚書安定公韓茂率騎屯相州之陽平郡
發冀州民造浮橋於碣磔津蓋吳遣其部落帥白廣平西掠新平
安定諸夷酋皆聚眾應之殺汧城守將吳遂進軍李閭堡分兵掠
臨晉巴東將軍章直與戰大敗之兵溺死於河者三萬餘人吳又
遣兵西掠至長安將軍叔孫拔與戰於渭北大破之斬首三萬餘
級庚申遼東王寶漏頭薨河東蜀薛永宗聚黨盜官馬數千匹驅
三千餘人入汾曲西通蓋吳受其位號秦州刺史金城公周鹿觀
率眾討之不克而還庚午詔殿中尚書扶風公元處真尚書平陽

公慕容嵩二萬騎討薛永宗詔殿中尚書乙拔率五將三萬騎討
蓋吳西平公寇提三將一萬騎討吳黨白廣平蓋吳自號天台王
署置百官辛未車駕還宮選六州兵勇猛者二萬人使永昌王仁
高涼王那分領爲二道各一萬騎南略淮泗以北徙青徐之民以
實河北癸未車駕西征

七年春正月戊辰車駕次東雍州庚午圍薛永宗營壘永宗出戰
大敗六軍乘之永宗衆潰永宗男女無少長赴汾水死辛未車駕
南幸汾陰庚辰帝臨戲水蓋吳退走北地二月丙戌幸濠安存問
父老丁亥幸昆明池丙申幸盤屋誅叛民耿青孫溫二壘與蓋吳
通謀者軍次陳倉誅散關氏害守將者還幸雍城田於岐山之陽
北道諸軍乙拔等大破蓋吳於杏城吳棄馬遁走永昌王仁至高
平擒劉義隆將王章略金鄉方與遷其民五千家於河北高涼王
那至濟南東平陵遷其民六千餘家於河北三月詔諸州坑沙門
毀諸佛像徙長安城工巧二千家於京師車駕旋軫幸洛水分軍
誅李閏叛羌是月金城邊岡天水梁會反據上邽東城秦州刺史
封勅文擊之斬岡衆復推會爲帥夏四月甲申車駕至自長安戊
子鄴城毀五層佛圖於泥像中得玉璽二其文皆曰受命於天既
壽永昌其一刻其旁曰魏所受漢傳國璽五月癸亥安豐公閭根
率騎詣上邽與勅文討梁會會走漢中蓋吳復聚杏城自號秦地
王假署山民衆旅復振於是遣永昌王仁高涼王那督北道諸軍
同討之六月甲申發定冀相三州兵二萬人屯長安南山諸谷以
防越逸丙戌發司幽定冀四州十萬人築畿上塞圍起上谷西至
于河廣袤皆千里秋八月蓋吳爲其下人所殺傳首京師永昌王
仁平其遺燼高涼王那破蓋吳黨白廣平生擒屠各路那羅於安

定斬于京師復略陽公羯兒王爵

八年春正月吐京胡阻險爲盜詔征東將軍武昌王提征南將軍淮南王他討之不下山胡曹僕渾等渡河西保山以自固招引朔方諸胡提等引軍討僕渾二月己卯高涼王那等自安定討平朔方胡因與提等合軍共攻僕渾斬之其衆赴險死者以萬數癸未行幸中山頒賜從官文武各有差高陽易縣民不從官命討平之徙其餘燼於北地三月河西王沮渠牧犍謀反伏誅徙定州丁零三千家於京師夏五月車駕還宮六月西征諸將扶風公元處真等八將坐盜沒軍資所在虜掠賊各千萬計並斬之八月衛大將軍樂安王範薨冬十月侍中中書監宜都王穆壽薨十二月鄯善遮逸國並遣子朝獻晉王伏羅薨

九年春正月劉義隆遣使朝貢氏楊文德受義隆官號守葭蘆城招誘武都陰平五部氏民詔仇池鎮將皮豹子討之文德棄城南走擒其妻子寮屬義隆白水太守郎啟玄率衆救文德豹子逆擊大破之啟玄文德走還漢中宕昌羌酋梁瓊慈遣使內附并貢方物二月癸卯行幸定州山東民饑啟倉賑之罷塞園作遂西幸上黨誅潞叛民二千餘家徙西河離石民五千餘家於京師詔於壺關東北大王山累石爲三封又斬其北鳳皇山南足以斷之三月車駕還宮夏五月甲戌以交趾公韓拔爲假節征西將軍領護西戎校尉鄯善王鎮鄯善賦役其民比之郡縣六月辛酉行幸廣德宮丁卯悅般國遣使求與王師俱討蠕蠕帝許之秋八月詔中外諸軍戒嚴九月乙酉治兵于西郊丙戌上幸陰山是月成周公萬度歸千里驛上大破焉耆國其王鳩尸卑那奔龜茲冬十月辛丑恒農王奚斤薨癸卯以婚姻奢靡喪葬過度詔有司更爲科限癸

亥大赦天下十有二月詔成周公萬度歸自焉耆西討龜茲皇太子朝于行宮遂從北討至于受降城不見蠕蠕因積糧城內留守而還北平王長孫敦坐事降爵爲公

十年春正月戊辰朔帝在漠南大饗百寮班賜有差甲戌北伐二月蠕蠕渠帥介綿他拔等率其部落千餘家來降蠕蠕吐賀真恐懼遠遁事具蠕蠕傳三月遂蒐于河西庚寅車駕還宮夏五月庚寅行幸陰山秋七月浮圖沙國遣使貢獻九月闕武磧上宋本作情且遂

北伐事具蠕蠕傳冬十月庚子皇太子及羣官奉迎於行宮壬午大饗班賜所獲及布帛各有差十有一月龜茲疏勒破落那員闐諸國各遣使朝獻十有二月戊申車駕至自北伐己酉以平昌公元託真爲中山王

十一年春正月乙酉行幸洛陽所過郡國皆親對高年存恤孤寡

以高涼王那爲儀同三司二月甲午大蒐於梁川皇子眞薨是月

大治宮室皇太子居于北宮車駕遂征懸瓠遣使者安慰境外

之民其不服者誅之永昌王仁大破劉義隆將劉坦之程天祚於

汝東斬坦之擒天祚夏四月癸卯車駕還宮賜從者及留臺郎吏

已上生口各有差六月己亥誅司徒崔浩辛丑北巡陰山秋七月

義隆遣其輔國將軍蕭斌之率衆六萬寇濟州刺史王買得棄州

走斌之遂入城仍使寧朔將軍王玄謨西攻滑臺詔枋頭鎮將平

南將軍南康公杜道儁助守竟州八月癸亥田於河西癸未治兵

於西郊九月辛卯與駕南伐癸巳皇太子北伐屯於漠南吳王余

留守京都庚子曲赦定冀相三州死罪已下發州郡兵五萬分給

諸軍冬十月癸亥車駕止枋頭詔殿中尚書長孫眞率騎五千自

石濟渡備玄謨遁走乙丑車駕濟河玄謨大懼棄軍而走衆各潰

散追躡斬首萬餘級器械山積帝遂至東平蕭斌之棄濟州退保
歷城乃命諸將分道並進使征西大將軍永昌王仁自洛陽出壽
春尚書長孫真趨馬頭楚王建趨鍾離高涼王那自青州趨下邳
車駕自邳道十有一月辛卯至于鄒山劉義隆魯郡太守崔邪利
率屬城降使使者以太牢祀孔子壬子次於彭城遂趨盱眙
國獻師子一十有二月丁卯車駕至淮詔刈藿葦作筏數萬而濟
義隆盱眙守將臧質閉門拒守將軍胡崇之等率衆二萬援盱眙
燕王譚大破之臬崇之等斬首萬餘級淮南皆降是月永昌王仁
破義隆將劉康祖斬之并虜將軍胡盛之王羅漢等傳致行宮癸
未車駕臨江起行宮於瓜步山永昌王仁自歷陽至於江西高涼
王那自山陽至於廣陵諸軍皆同日臨江所過城邑莫不望塵奔
潰其降者不可勝數甲申義隆使獻百牢貢其方物又請進女於
皇孫以求和好帝以師婚非禮許和而不許婚使散騎侍郎夏侯
野報之詔皇孫爲書致馬通問焉

正平元年春正月丙戌朔大會羣臣於江上班賞各有差文武受
爵者二百餘人丁亥輿駕北旋是月破洛那蜀賓迷密諸國各遣
使朝獻二月戊寅車駕濟河癸未次於魯口皇太子朝於行宮三
月己亥車駕至自南伐飲至策勳告於宗廟以降民五萬餘家分
置近畿賜留臺文武所獲軍資生口各有差夏五月壬寅大赦六
月壬戌改年車師國王遣子入侍詔曰夫刑網太密犯者更衆朕
甚愍之有司其案律令務求厥中自餘有不便於民者依比增損
詔太子少傅游雅中書侍郎胡方回等改定律制略陽王勰兒儀
同三司高涼王那有罪賜死戊辰皇太子薨壬申葬景穆太子於

金陵秋七月丁亥行幸陰山省諸曹吏員三分之一九月癸巳車駕還宮冬十月庚申行幸陰山劉義隆遣使朝貢詔殿中將軍郎法祐使於義隆已巳司空上黨王長孫道生薨十有二月丁丑車駕還宮封皇孫肅宗為高陽王尋以皇孫世嫡不宜在藩乃止封秦王翰為東平王燕王譚為臨淮王楚王建為廣陽王吳王余為南安王

二年春正月庚辰朔南來降民五千餘家於中山謀叛州軍討平之冀州刺史張掖王沮渠萬年與降民通謀賜死三月甲寅帝崩於永安宮時年四十五祕不發喪中常侍宗愛矯皇后令殺東平王翰迎南安王余入而立之大赦收元為永平尊皇后赫連氏為皇太后三月辛卯上尊諡曰太武皇帝葬於雲中金陵廟號世祖夏六月劉義隆將檀和之志濟州梁坦及魯安生軍于涼索龍萌

薛安都寇弘農秋七月征南將軍安定公韓元興討之和之退梁坦安生亦走八月冠軍將軍封禮率騎二千從涇津南渡赴弘農九月司空高平公兒烏干屯潼關平南將軍昌黎公元遼屯河内冬十月丙午朔余為宗愛所賊殿中尚書長孫渴侯與尚書陸麗迎立皇孫是為高宗焉帝生不逮密太后及有所識言則悲慟哀感傍人太宗聞而嘉歎暨太宗不豫衣不釋帶性清儉率素服御飲膳取給而已不好珍麗食不二味所幸昭儀貴人衣無兼綵羣臣白帝更峻京邑城隍以從周易設險之義又陳蕭何壯麗之說帝曰古人有言在德不在險屈丐蒸土築城而朕滅之豈在城也今天下未平方須民力上功之事朕所未為蕭何之對非雅言也每以財者軍國之本無所輕費至賞賜皆是死事勲績之家親戚愛寵未曾橫有所及臨敵常與士卒同在矢石之間左右死傷者

相繼而帝神色自若是以人思効命所向無前命將出師指授節度從命者無不制勝違爽者率多敗失性又知人拔士於卒伍之中惟其才效所長不論本末兼甚嚴斷明於刑賞功者賞不遺賊罪者刑不避親雖寵愛之終不虧法常曰法者朕與天下共之何敢輕也故大臣犯法無所寬假雅長聽察瞬息之間下人無以措其姦隱然果於誅戮後多悔之司徒崔浩既死之後帝北伐時宣城公李孝伯疾篤傳者以爲卒也帝聞而悼之謂左右曰李宣城可惜又曰朕向失言崔司徒可惜李宣城可哀褒貶雅意自此類也

恭宗景穆皇帝諱晃太武皇帝之長子也母賀夫人延和元年春正月丙午立爲皇太子時年五歲明慧彊識聞則不忘及長好讀經史皆通大義世祖甚奇之世祖東征和龍詔恭宗錄尚書事西征涼州詔恭宗監國初世祖之伐河西也李順等咸言姑臧無水草不可行師恭宗有疑色及車駕至姑臧乃詔恭宗曰姑臧城東西門外涌泉合於城北其大如河自餘溝渠流入澤中其間乃無燥地澤草茂盛可供大軍數年人之多言亦可惡也故有此勅以釋汝疑恭宗謂官臣曰爲人臣不實若此豈是忠乎吾初聞有疑但帝決行耳幾誤人大事言者復何面見帝也真君四年恭宗從世祖討蠕蠕至鹿渾谷與賊相遇虜惶怖部落擾亂恭宗言於世祖曰今大軍卒至宜速進擊掩其不備破之必矣尚書令劉潔固諫以爲塵盛賊多出至平地恐爲所圍須軍大集然後擊之可也恭宗謂潔曰此塵之盛由賊怙恃軍人亂故何有營上而有此塵世祖疑之遂不急擊蠕蠕遠遁旣而獲虜候騎世祖問之對曰蠕蠕不覺官軍卒至上下惶懼引衆北走經六七日知無追者始乃徐行世祖深恨之自是恭宗所言軍國大事多見納用遂和葛

機初恭宗監國曾令曰周書言任農以耕事貢九穀任國以樹事貢草木任工以餘材貢器物任商以市事貢貨賄任牧以畜事貢鳥獸任嬪以女事貢布帛任衡以山事貢其材任虞以澤事貢其物其制有司課畿內之民使無牛家以人牛力相貿墾殖鋤耨其有牛家與無牛家一人種田二十二畝償以私鋤功七畝如是爲差至與小老無牛家種田七畝小老者償以鋤功二畝皆以五口下貧家爲率各列家別口數所勸種頃畝明立簿目所種者於地首標題姓名以辨播殖之功又禁飲酒雜戲棄本沽販者墾田大爲增闢正平元年六月戊辰薨於東宮時年二十四庚午冊曰嗚呼惟余誕資明叡岐嶷風成正位少陽克荷基構賓於四門百揆時敘允釐庶績風雨不迷宜享無疆隆我皇祚如何不幸奄焉殂殞朕用悲慟于厥心今使使持節兼太尉張黎兼司徒竇瑾奉策卽柩謚曰景穆以顯昭令德魂而有靈其尚嘉之高宗卽位追尊爲景穆皇帝廟號恭宗

史臣曰世祖聰明雄斷威靈傑立藉二世之資奮征伐之氣遂戎軒四出周旋險夷掃統萬平秦隴翦遼海盪河源南夷荷擔北蠕削跡廓定四表混一戎華其爲功也大矣遂使有魏之業光邁百王豈非神叡經綸事當命世至於初則東儲不終末乃豐成所忽固本貽防殆弗思乎恭宗明德令聞夙世殂天其戾圉之悼歟

高宗紀第五

高宗文成皇帝諱濬恭宗景穆皇帝之長子也母曰閭氏真君元年六月生於東宮帝少聰達世祖愛之常置左右號世嫡皇孫年五歲世祖北巡帝從在後逢虜帥桎一奴欲加其罰帝謂之曰奴今遭我汝宜釋之帥奉命解縛世祖聞之曰此兒雖小欲以天子自處意竒之旣長風格異常每有大政常參決可否正平二年十月戊申卽皇帝位於永安前殿大赦改年

興安元年冬十月以驃騎大將軍元壽樂爲太宰都督中外諸軍事錄尚書事尚書長孫渴侯爲尚書令加儀同三司十有一月丙子二人爭權並賜死癸未廣陽王建薨臨淮王譚薨甲申皇妣薨太尉張黎司徒古弼以議不合旨黜爲外都大官平南將軍宋子

侯周怵進爵樂陵王南部尚書章安子陸麗爲平原王文武各加位一等壬寅追尊景穆太子爲景穆皇帝皇妣爲恭皇后尊保母常氏爲保太后隴西屠各王景文叛詔統萬鎮將南陽王惠壽討平之十有二月戊申祔葬恭皇后於金陵乙卯初復佛法丁巳以樂陵王周怵爲太尉平原王陸麗爲司徒鎮西將軍杜元寶爲司空保達沙獵國各遣使朝獻戊寅建業公陸侯進爵東平王廣平公杜遣進爵爲王癸亥詔以營州蝗開倉賑恤甲子太尉樂陵王周怵有罪賜死濮陽公閭若文進爵爲王

二年春正月辛巳司空杜元寶進爵京兆王廣平王杜遣薨尚書僕射東安公劉尼進爵爲王封建寧王崇子麗爲濟南王癸未詔與民雜調十五丙戌尚書西平公源賀進爵爲王二月己未司空京兆王杜元寶謀反伏誅建寧王崇崇子濟南王麗爲元寶所引

各賜死乙丑發京師五千人穿天淵池是月劉義隆子劼殺其父

而自立三月壬午尊保太后爲皇太后安豐公閭虎皮進爵爲河

間王乙未疏勒國遣使朝獻夏五月乙酉行幸崢山辛卯還宮是

月劉劼弟駿殺劼而自立閏月乙亥太皇太后赫連氏崩秋七月

辛亥行幸陰山濮陽王閭若文征西大將軍永昌王仁謀反乙丑

賜仁死於長安若文伏誅己巳車駕還宮是月築馬射臺於南郊

八月辛未渴槃陀國遣使朝貢戊戌詔曰朕以眇身纂承大業懼

不能宣慈惠和寧濟萬寓夙夜兢兢若臨淵谷然卽位以來百姓

晏安風雨順序邊方無事衆瑞兼呈不可稱數又於苑內獲方寸

玉印其文曰子孫長壽羣公卿士咸曰休哉豈朕一人克臻斯應

實由天地祖宗降祐之所致也思與兆庶共茲嘉慶其令民大酺

三日諸殊死已下各降罪一等九月壬子闕武於南郊冬十有一

月辛酉行幸信都中山觀察風俗十有二月誅河間鄭民爲賊盜者男年十五以下爲生口班賜從臣各有差甲午車駕還宮庫莫奚契丹奚賓等十餘國各遣使朝貢復北平公長孫敷王爵

興光元年春正月乙丑以侍中河南公伊戾爲司空二月甲午帝

至道壇登受圖籙禮畢曲赦京師班賞各有差夏六月丙寅行幸

陰山秋七月庚子皇子

弘○宋本詳

生辛丑大赦改年八月甲戌趙王深

薨乙亥車駕還宮己丑皇叔虎頭龍頭薨九月庚申庫莫奚國獻

名馬有一角狀如麟是月閉都城門大索三日獲姦人亡命數百

人冬十有一月北鎮將房杖擊蠕蠕虜其將豆渾與句等獲馬十

餘匹戊戌行幸中山遂幸信都十有二月丙子還幸靈丘至溫泉

宮庚辰車駕還宮出于叱萬單國各遣使朝獻

太安元年春正月辛酉奉世祖恭宗神主于太廟車騎大將軍樂

平王拔有罪賜死二月癸未武昌王提薨三月己亥詔曰今始奉

世祖恭宗神主于太廟又於西苑遍秋羣神朕以大慶饗賜百寮

而犯罪之人獨卽刑戮非所以子育羣生矜及衆庶夫聖人之教

自近及遠是以周文刑於寡妻至于兄弟以御家邦化苟從近恩

亦宜然其曲赦京師死囚已下夏六月壬戌詔名皇子

昌○宋本詳

曲赦

京城改年癸酉詔曰夫爲治者因宜以設官舉賢以任職故上下

和乎民無怨謗若官非其人姦邪在位則政教陵遲至於凋薄思

明黜陟以隆治道今遣尚書穆伏真等三十人巡行州郡觀察風

俗入其境農不墾殖田畝多荒則徭役不時廢於力也耆老飯蔬

食少壯無衣褐則聚斂煩數匱於財也閭里空虛民多流散則緩

導無方疎於恩也盜賊公行劫奪不息則威禁不設失於刑也衆

謗並興大小嗟怨善人隱伏佞邪當途則爲法混淆昏於政也諸

如此比黜而戮之善於政者褒而賞之其有阿枉不能自申聽詣使告狀使者檢治若信清能衆所稱美誣告以求直反其罪使者受財斷察不平聽詣公車上訴其不孝父母不順尊長爲吏姦暴及爲盜賊各具以名上其容隱者以所匿之罪罪之是月遮逸國遣使朝貢戊寅帝畋於犢倪山甲申還宮秋七月丙辰行幸河西八月丁亥車駕還宮冬十月波斯疏勒國並遣使朝貢庚午以遼西公常英爲太宰進爵爲王

二年春正月乙卯立皇后馮氏二月丁巳立皇子^{啓宗}爲皇太子大

赦天下丁零數千家亡匿井陘山聚爲寇盜詔定州刺史許宗之并州刺史乞佛成龍討平之夏六月羽林郎于判元提等謀逆伏誅秋八月甲申畋於河西是月平西將軍漁陽公尉眷北擊伊吾克其城大獲而還九月辛巳河東公閭毗零陵公閭紇並進爵爲王冬十月甲申車駕還宮甲午曲赦京師十有一月尚書西平王源賀改封隴西王噉噉普嵐國並遣使朝獻劉駿濮陽太守姜龍駒新平太守楊伯倫各棄郡率吏民來降

三年春正月壬戌畋於崢山戊辰還宮粟特于闐國各遣使朝貢徵魚陽公尉眷拜太尉進爵爲王錄尚書事夏五月庚申畋於松山己巳還宮封皇弟新成爲陽平王六月癸卯行幸陰山秋八月畋於陰山之北己亥還宮冬十月將東巡詔太宰常英起行宮於遼西黃山十有一月蠻王文虎龍率千餘家內附十有二月以州鎮五蝗民饑使使者開倉以賑之是月于闐扶餘等五十餘國各遣使朝獻

四年春正月丙午朔初設酒禁乙卯行幸廣寧溫泉宮遂東巡平州庚午至於遼西黃山宮遊宴數日親對高年勞問疾苦二月丙

子登碣石山觀滄海大饗羣臣於山下班賞進爵各有差改碣石
山爲樂遊山築壇記行於海濱戊寅南幸信都畋遊於廣川三月
丁未觀馬射於中山所過郡國賜復一年丙辰車駕還宮起太華
殿乙丑東平王陸侯薨夏五月壬戌詔曰朕卽阼至今屢下寬大
之旨蠲除煩苛去諸不急欲令物獲其所人安其業而牧守百里
不能宣揚恩意求欲無厭斷截官物以入於已使課調懸少而深
文極墨委罪於民苟求免咎曾不改懼國家之制賦役乃輕比年
已來雜調減省而所在州郡咸有逋懸非在職之官綏導失所貪
穢過度誰使之致自今常調不充民不安業宰民之徒加以死罪
申告天下稱朕意焉六月丙申畋於松山秋七月庚午行幸河西
九月乙巳還宮辛亥太華殿成丙寅饗羣臣大赦天下冬十月甲
戌北巡至陰山有故塚毀廢詔曰昔姬文薨枯骨天下歸仁自今
有穿毀墳隲者斬之劉駿將殷孝祖修兩城於清水東詔鎮西將
軍天水公封勃文等擊之辛卯車駕次于車輪山累石記行征西
將軍皮豹子等三將三萬騎助擊孝祖車駕度漠蠕蠕絕跡遠遁
其別部烏朱賀頽庫世頽率衆來降十有二月征東將軍中山王
託真薨

五年春正月己巳朔征西將軍皮豹子略地至高平大破孝祖斬
獲五千餘級二月己酉侍中司空河南公伊戾薨三月庚寅曲赦
京師死罪已下夏四月乙巳封皇弟子推爲京兆王五月居常國
遣使朝獻六月戊申行幸陰山秋八月庚戌遂幸雲中壬戌還宮
九月戊辰詔曰夫褒賞必於有功刑罰審於有罪此古今之所同
由來之常式牧守益民侵食百姓以營家業王賦不充雖歲滿去
職應計前逋正其刑罪而主者失於督察不加彈正使有罪者優

游獲免無罪者妄受其辜是啟姦邪之路長貪暴之心豈所謂原情處罪以正天下自今諸遷代者卿列在職殿最案制治罪克舉者加之爵寵有愆者肆之刑戮使能否殊貫刑賞不差主者明爲條制以爲常楷儀同三司敦煌公李寶薨冬十有二月戊申詔曰朕承洪業統御羣有思恢政化以濟兆民故薄賦斂以實其財輕徭役以紓其力欲令百姓脩業人不匱乏而六鎮雲中高平二雍秦州徧遇災旱年穀不收其遣開倉廩以賑之有流徙者論還桑梓欲市糴他界爲關傍郡通其交易之路若典司之官分職不均使上恩不達於下下民不贍於時加以重罪無有攸縱

和平元年春正月甲子朔大赦改元庚午詔散騎常侍馮閭使於劉駿二月衛將軍安王良督東雍吐京六壁諸軍西趣河西征西將軍皮豹子等督河西諸軍南趨石樓以討河西叛胡夏四月

戊戌皇太后常氏崩於壽安宮五月癸酉薨昭太后於廣寧鳴鵲山六月甲午詔征西大將軍陽平王新成等督統萬高平諸軍出南道南郡公李惠等督涼州諸軍出北道討吐谷渾什寅崔浩之誅也史官遂廢至是復置河西叛胡詣長安首罪遣使者安慰之秋七月乙丑劉駿遣使朝貢壬午行幸河西八月西征諸軍至西平什寅走保南山九月諸軍濟河追之遇瘴氣多有疫疾乃引軍還獲畜二十餘萬庚午興駕還宮冬十月居常王獻馴象三十有一月詔散騎侍郎盧度世員外郎朱安興使於劉駿

二年春正月乙酉詔曰刺史牧民爲萬里之表自頃每因發調逼民假貸大商富賈要射時利旬日之間增贏十倍上下通同分以潤屋故編戶之家困於凍餒豪富之門日有兼積爲政之弊莫過於此其一切禁絕犯者十疋以上皆死布告天下咸令知禁二月

辛卯行幸中山丙午至於鄴遂幸信都三月劉駿遣使朝貢輿駕所過皆親對高年問民疾苦詔民年八十以上一子不從役靈丘南有山高四百餘丈乃詔羣官仰射山峰無能踰者帝彎弧發矢出山三十餘丈過山南二百二十步遂刊石勒銘是月發并肆州五千人治河西獵道辛巳輿駕還宮夏四月乙未侍中征東大將軍河東王閭毗薨五月癸未詔南部尚書黃盧頭李敷等考課諸州秋七月戊寅封皇弟小新成爲濟陰王加征東大將軍鎮平原天賜爲汝陰王加征南大將軍鎮虎牢萬壽爲樂浪王加征北大將軍鎮和龍洛侯爲廣平王壬午行巡山北八月戊辰波斯國遣使朝獻丁丑輿駕還宮冬十月詔假員外散騎常侍游明根員外郎昌邑侯和天德使於劉駿博陵之深澤章武之東州盜殺縣令州軍討平之廣平王洛侯薨

三年春正月壬午以車騎大將軍東郡公乙渾爲太原王癸未樂浪王萬壽薨二月癸酉畋于崞山遂觀漁于旋鴻池三月甲申劉駿遣使朝貢高麗徒王契噉思厭於師疏勒石那悉居半渴槃陀諸國各遣使朝獻夏六月庚申行幸陰山詔將軍陸真討雍州叛氏仇儔檀等平之秋七月壬寅幸河西九月壬辰征西大將軍常山王素薨冬十月丙辰詔曰朕承洪緒統御萬國垂拱南面委政羣司欲緝熙治道以致寧一夫三代之隆莫不崇尚年齒今選舉之官多不以次令班白處後晚進居先豈所謂彝倫攸敘者也諸曹選補宜各先盡勞舊才能是月詔員外散騎常侍游明根員外郎昌邑侯和天德使於劉駿十有一月壬寅輿駕還宮十有二月乙卯制戰陳之法十有餘條因大讎耀兵有飛龍騰虵魚鼈之變以示威武戊午零陵王閭拔薨

四年春三月乙未賜京師民年七十以上太官厨食以終其年皇子胡仁薨追封樂陵王乙巳詔曰朕憲章舊典分職設官欲令敷揚治化緝熙庶績然在職之人皆蒙顯擢委以事任當厲已竭誠務省徭役使兵民優逸家給人贍今內外諸司州鎮守宰侵使兵民勞役非一自今擅有召役逼雇不程皆論同枉法夏四月癸亥上幸西苑親射虎三頭五月壬辰侍中漁陽王尉眷薨壬寅行幸陰山秋七月壬午詔曰朕每歲以秋日閑月命羣官講武平壤所幸之處必立宮壇糜費之功勞損非一宜仍舊貫何必改作也八月丙寅遂畋于河西詔曰朕順時畋獵而從官殺獲過度既殫禽獸乖不合圍之義其勅從官及典圍將校自今已後不聽濫殺其畋獲皮肉別自頒賚壬申詔曰前以民遭饑寒不自存濟有賣鬻男女者盡仰還其家或因緣勢力或私行請託共相通容不時檢校令良家子息仍爲奴婢今仰精究不聽取贖有犯加罪若仍不檢還聽其父兄上訴以掠人論九月辛巳車駕還宮冬十月以定相二州貢霜殺稼免民田租是月詔員外散騎常侍游明根驍騎將軍昌邑子婁內廷寧朔將軍襄平子李五鱗使于劉駿十有二月辛丑詔曰名位不同禮亦異數所以殊等級示軌儀今喪葬嫁娶大禮未備貴勢豪富越度奢靡非所謂式昭典憲者也有司可爲之條格使貴賤有章上下咸序著之于令壬寅詔曰夫婚姻者人道之始是以夫婦之義三綱之首禮之重者莫過於斯尊卑高下宜令區別然中代以來貴族之門多不率法或貪利財賄或因緣私好在於苟合無所選擇令貴賤不分巨細同貫塵穢清化虧損人倫將何以宣示典謨垂之來裔今制皇族師傅王公侯伯及士民之家不得與百工伎巧卑姓爲婚犯者加罪

五年春正月丁亥封皇弟雲爲任城王二月詔以州鎮十四去歲
蟲水開倉賑恤夏四月癸卯頓丘公李峻進爵爲王閏月戊子帝
以旱故減膳責躬是夜澍雨大降五月庚申劉駿死子子業僭立
六月丁亥行幸陰山秋七月辛丑北鎮游軍大破蠕蠕壬寅行幸
河西九月辛丑車駕還宮冬十月琅邪王司馬楚之薨十有二月
南秦王楊難當薨吐呼羅國遣使朝獻

六年春正月丙申大赦天下二月丁丑行幸樓煩宮高麗王對
曼諸國各遣使朝獻三月戊戌相州刺史西平郡王吐谷渾權薨
乙巳車駕還宮夏四月破洛那國獻汗血馬普嵐國獻寶劍五月
癸卯帝崩于太華殿時年二十六六月丙寅上尊謚曰文成皇帝
廟號高宗八月葬雲中之金陵

史臣曰世祖經略四方內鎮虛耗既而國盛時艱朝野楚楚高宗
與時消息靜以鎮之養威布德懷緝中外自非機悟深裕於濟爲
心亦何能若此可謂有君人之度矣

亦亦而猶昔北而臨吾人之到矣

魏書卷六

顯祖紀第六

西魏書卷六
顯祖紀第六

顯祖獻文皇帝諱弘高宗文成皇帝之長子也母曰李貴人興光
元年秋七月生於陰山之北太安二年二月立爲皇太子聰敏機
悟幼而有濟民神武之規仁孝純至禮敬師友和平六年夏五月
甲辰卽皇帝位大赦天下尊皇后曰皇太后車騎大將軍乙渾矯
詔殺尚書楊保年平陽公賈愛仁南陽公張天度于禁中戊申侍
中司徒平原王陸麗自湯泉入朝渾又殺之己酉以侍中車騎大
將軍乙渾爲太尉錄尚書事東安王劉尼爲司徒尚書左僕射和
其奴爲司空壬子以淮南王他爲鎮西大將軍儀同三司鎮涼州
六月封繁陽侯李疑爲丹陽王征東大將軍馮熙爲昌黎王乙丑
詔曰夫賦歛煩則民財匱課調輕則用不足是以十一而稅頌聲

作矣先朝權其輕重以惠百姓朕承洪業上惟祖宗之休命夙興待旦惟民之恤欲令天下同於逸豫而徭賦不息將何以塞煩去苛拯濟黎元者哉今兵革不起畜積有餘諸有雜調一以與民秋七月癸巳太尉乙渾爲丞相位居諸王上事無大小皆決於渾九月唐子曲赦京師丙午詔曰先朝以州牧親民宜置良佐故勅有司班九條之制使前政選吏以待俊乂必謂銓衡允哀朝綱應敘然牧司寬情不祇憲旨舉非其人愆于典度今制刺史守宰到官之日仰自舉民望忠信以爲選官不聽前政共相干冒若簡任失所以罔上論是月劉子業征北大將軍義陽王劉昶自彭城來隆冬十月徵陽平王新成京兆王子推濟陰王小新成汝陰王天賜任城王雲入朝是歲劉子業叔父彧殺子業僭立

天安元年春正月己丑朔大赦改年二月庚申丞相太原王乙渾

謀反伏誅乙亥以侍中元孔雀爲濮陽王侍中陸定國爲東郡王

三月庚子以隴西王源賀爲太尉辛丑高宗文成皇帝神主祔于

太廟辛亥帝幸道壇親受符籙曲赦京師高麗波斯于闐阿襲諸

國遣使朝獻秋七月開二字詔諸有詐取爵位罪特原之削其爵職

其有祖父假爵號貨賕以正名者不聽繼襲諸非勞進超遷者亦

各還初不以實聞者以大不敬論九月劉彧司州刺史常珍奇以

懸瓠內屬巴西初立鄉學郡置博士二人助教二人學生六十人

劉彧徐州刺史薛安都以彭城內屬彧將張永沈攸之擊安都詔

北部尚書尉元爲鎮南大將軍都督諸軍事鎮東將軍城陽公孔

伯恭爲副出東道救彭城殿中尚書鎮西大將軍西河公元石都

督荆豫南雍州諸軍事給事中京兆侯張鷟奇爲副出西道救懸

瓠冬十月曹利彤曷國各遣使朝獻十有一月壬子劉彧兗州刺

史畢衆敬遣使內屬十有二月己未尉元軍次于秣陵將周凱張永沈攸之相繼退走皇弟安平薨是歲州鎮十一旱民饑開倉賑恤

皇興元年春正月癸巳尉元大破張永沈攸之於呂梁東斬首數萬級凍死者甚衆獲劉彧秦州刺史垣恭祖羽林監沈承伯永攸之單騎走免獲軍資器械不可勝數劉彧遣使朝貢庚子東平王道符謀反於長安殺副將駙馬都尉萬古真鍾鹿公李恢雍州刺史魚玄明丙午詔司空平昌公和其奴東陽公元丕等討道符丁未道符司馬段太陽攻道符斬之傳首京師道符兄弟皆伏誅閏月以頓丘王李峻爲太宰劉彧青州刺史沈文秀冀州刺史崔道固並遣使請舉州內屬平東將軍長孫陵平南將軍廣陵公侯窮奇赴援之二月詔使持節都督諸軍事征南大將軍慕容白曜

督騎五萬次於碣磔爲東道後援濟陰王小新成薨高麗庫莫奚具伏弗郁羽陵日連匹黎余于闐諸國各遣使朝貢劉彧東平太守申纂戍無鹽遇絕王使詔征南大將軍慕容白曜督諸軍以討之三月甲寅尅之沈文秀崔道固復叛歸劉彧白曜回師討之拔或肥城垣苗麋溝三戍夏四月白曜攻升城戍主房崇吉遁走秋八月白曜攻歷城丁酉行幸武州山石窟寺戍申皇子步景生大赦改年九月壬子高麗于闐普嵐粟特國各遣使朝獻丁巳進馮翊公李白爵梁郡王是月詔賜六鎮貧人布人三匹冬十月癸卯田於那男池濮陽王孔雀坐怠慢降爵爲公

二年春二月癸未田于西山親射虎豹崔道固及劉彧梁鄒戍主平原太守劉休賓舉城降是月徐州羣盜司馬休符自稱晉王將軍尉元討平之三月白曜進圍東陽戊午劉彧遣使朝貢夏四月

辛丑以南郡公李惠爲征南大將軍儀同三司都督關右諸軍事
雍州刺史遷爵爲王高麗庫莫奚契丹具伏弗郁羽陵日連匹黎
余叱六手悉萬丹阿大何羽真侯于闐波斯國各遣使朝獻五月
乙卯田于崞山遂幸繁峙辛酉還宮六月庚辰以河南關地曲赦
京師殊死以下以昌黎土馮熙爲太傅秋九月辛亥封皇叔楨爲
南安王長壽爲城陽王太洛爲章武王休爲安定王冬十月辛丑
上田於冷泉十有一月以州鎮二十七水旱開倉賑恤十有二月
甲午詔曰頃張永迷擾敢拒王威暴骨原隰殘廢不少死生冤痛
朕甚愍焉天下民一也可敕郡縣永軍殘廢之士聽還江南露骸
草莽者收瘞之是月悉萬丹等十餘國各遣使朝貢

二年春正月乙丑東陽潰虜沈文秀戊辰司空平昌公和其奴薨
二月蠕蠕高麗庫莫奚契丹國各遣使朝獻已卯以上黨公墓容

曰曜爲都督青齊東徐三州諸軍事征南大將軍開府儀同三司

青州刺史進爵濟南王夏四月壬辰劉彧遣使朝貢丙申名皇子

曰宏○宋本諱大赦天下丁酉田于崞山五月徙青州民於京師六月辛

未立皇子宏○宋本諱爲皇太子秋七月蠕蠕國遣使朝貢冬十月侍中

太宰頓丘王李竣薨十有一月吐谷渾別帥白楊提度汗率戶內

附襄城公韓頽進爵爲王

四年春正月詔州鎮十一民饑開倉賑恤二月以東郡王陸定國

爲司空高麗庫莫奚契丹各遣使朝獻吐谷渾拾寅不供職貢詔

使持節征西大將軍上黨王長孫觀討之廣陽王石侯薨三月丙

戌詔曰朕思百姓病苦民多非命明發不寐疚心疾首是以廣集

良醫遠採名藥欲以救護兆民可宣告天下民有病者所在官司

遣醫就家診視所須藥物任醫量給之夏四月辛丑大赦天下戊

申長孫觀軍至曼頭山大破拾寅拾寅與麾下數百騎宵遁拾寅從弟豆勿來及其渠帥匹婁拔累等率所領降附五月封皇弟長樂爲建昌王六月劉彧遣使朝貢秋八月羣盜入彭城殺鎮將元解愁長史勒兵滅之蠕蠕犯塞九月丙寅與駕北伐諸將俱會于女水大破虜衆事具蠕蠕傳司徒東安王劉尼坐事免壬申車駕至自北伐飲至策勲告於宗廟冬十月誅濟南王慕容白曜高平公李敷十有一月詔弛山澤之禁十有二月甲辰幸鹿野苑石窟寺陽平王新成薨

五年春三月乙亥詔曰天安以來軍國多務南定徐方北掃遺虜征戍之人亡竄非一雖罪合刑書每加哀宥然寬政猶水遁逃遂多宜申明典刑以肅姦僞自今諸有逃亡之兵及下代守宰浮游不赴者限六月三十日悉聽歸首不首者論如律詔假員外散騎

常侍邢祐使於劉彧夏四月西部勅勒叛詔汝陰王天賜給事中羅雲討之雲爲勅勒所襲殺死者十五六北平王長孫敦薨六月丁未行幸河西秋七月丙寅遂至陰山八月丁亥車駕還宮帝雅薄時務常有遺世之心欲禪位於叔父京兆王子推語在任城王雲傳羣臣固請帝乃止丙午冊命太子曰昔堯舜之禪天下也皆由其子不肖若丹朱商均能負荷者豈搜揚仄陋而授之哉爾雖沖弱有君人之表必能恢隆王道以濟兆民今使太保建安王陸馱太尉源賀持節奉皇帝璽綬致位於爾躬其踐昇帝位克廣洪業以光祖宗之烈使朕優游履道願神養性可不善歟丁未詔曰朕承洪業運屬太平淮岱率從四海清晏是以希心玄古志存澹泊躬覽萬務則損頤神之和一日或曠政有淹滯之失但子有天下歸尊於父父有天下傳之於子今稽協靈運考會羣心爰命儲

宮踐昇大位朕方優游恭已棲心浩然社稷乂安克廣其業不亦善乎百官有司其祇奉胤子以答天休宣布寓內咸使聞悉於是羣公奏曰昔三皇之世澹泊無爲故稱皇是以漢高祖既稱皇帝尊其父爲太上皇明不統天下今皇帝幼冲萬機大政猶宜陛下總之謹上尊號太上皇帝乃從之己酉太上皇帝徙御崇光宮採椽不斲土階而已國之大事咸以聞承明元年年二十三崩於永安殿上尊謚曰獻文皇帝廟號顯祖葬雲中金陵

史臣曰聰叡夙成兼資能斷其顯祖之謂乎故能更清漠野大啟南服而早懷厭世之心終致宮闈之變將天意哉

魏書卷六

顯祖紀第六

終

魏書卷七上

高祖紀第七上

魏書卷七上

顯祖紀第六

高祖孝文皇帝諱宏顯祖獻文皇帝之長子母曰李夫人皇興元年八月戊申生於平城紫宮神光照於室內天地氛氲和氣充塞帝生而潔白有異姿襁褓岐嶷長而淵裕仁孝綽然有君人之表顯祖尤愛異之三年夏六月辛未立爲皇太子五年秋八月丙午卽皇帝位於太華前殿大赦改元延興元年丁未劉彧遣使朝貢九月壬戌詔在位及民庶直言極諫有利民並治損政傷化悉心以聞壬午青州高陽民封辯自號齊王聚黨千餘人州軍討滅之高麗民奴乂等相率來降各賜田宅冬十月丁亥沃野統萬二鎮勅勒叛詔太尉隴西王源賀追擊至枹罕滅之斬首三萬餘級徙其遺逆於冀定相三州爲營戶庚寅以征東大將軍南安王楨爲

假節都督涼州及西戎諸軍事領護西域校尉儀同三司鎮涼州朔方民曹平原招集不逞破石樓堡殺軍將劉彧將垣崇祖率衆二萬自郁洲寇東莞州屯于南城固十有一月刺史于洛侯討破之崇祖還郁洲妖賊司馬小君聚衆反於平陵齊州刺史武昌王平原討擒之十有二月乙酉以駙馬都尉穆亮爲趙郡王壬辰詔訪舜後獲東萊郡民嬌苟之復其家畢世以彰盛德之不朽復前濮陽王孔雀本封辛丑趙郡王穆亮徙封長樂王

二年春正月乙卯統萬鎮胡民相率北叛詔寧南將軍交趾公韓拔等追滅之大陽蠻酋桓誕率戶內屬拜征南將軍封襄陽王曲赦京師及河西南至秦涇西至枹罕北至涼州諸鎮詔假員外散騎常侍邢祐使於劉彧二月乙巳詔曰尼父稟達聖之姿體生知量窮理盡性道光四海頃者淮徐未賓廟隔非所致令祠典寢

頓禮章殄滅遂使女巫妖覲淫滛非禮殺生鼓舞倡優媒狎豈所以尊明神敬聖道者也自今已後有祭孔子廟制用酒脯而已不聽婦女合雜以祈非望之福犯者以違制論其公家有事自如常禮犧牲粢盛務盡豐潔臨疾致敬令肅如也牧司之官明糾不法使禁令必行蠕蠕犯塞太上皇帝次於北郊詔諸將討之虜遁走其別帥阿大千率十餘落來降東部勅勒叛奔蠕蠕太上皇帝追之至石磧不及而還壬子高麗國遣使朝貢三月太上皇帝至自北討戊辰以散騎常侍駙馬都尉萬安國爲大司馬大將軍封安城王庚午車駕耕於籍田石城郡獲曹平原送京師斬之連川敕勒謀叛徙配青徐齊竟四州爲營戶夏四月庚子詔工商雜伎盡聽赴農諸州郡課民益種菜果辛亥劉彧遣使朝貢癸酉詔沙門不得去寺浮遊民間行者仰以公文是月劉彧死子昱僭立五月

丁巳詔軍驚給璽印傳符次給馬印六月安州民遇水雹丐租賑恤丙申詔曰頃者州郡選貢多不以實碩人所以窮處幽仄鄙夫所以超分妄進豈所謂旌賢樹德者也今年貢舉尤爲猥濫自今所遣皆門盡州郡之高才極鄉閭之選閏月壬子蠕蠕寇敦煌鎮將尉多侯擊走之又寇晉昌守將薛奴擊走之戊午行幸陰山秋七月光州民孫晏等聚黨千餘人叛通劉昱刺史叔孫瓚討平之辛丑高麗國遣使朝貢壬寅詔州郡縣各遣二人才堪專對者赴九月講武當親問風俗八月丙辰百濟國遣使奉表請師伐高麗辛酉地豆于庫莫奚國遣使朝貢昌寧國遣使獻蜀馬河西費也頭及薄骨律鎮將擊走之九月辛巳車駕還宮戊申統萬鎮將河間王閭虎皮坐合殘賜死已酉詔以州鎮十一水丐民田租開倉賑恤又詔流逆之民皆令還本違者配徙邊鎮冬十月蠕蠕犯塞及於五原十有一月太上皇帝親討之將度漠襲擊蠕蠕聞軍至大懼北走數千里以窮寇遠遁不可追乃止丁亥封皇叔略爲廣川王壬辰分遣使者巡省風俗問民疾苦帝每月一朝崇光宮十有二月庚戌詔曰書云三載一考三考黜陟幽明頃者已來官以勞升未久而代牧守無恤民之心競爲聚斂送故迎新相屬於路非所以固民志隆治道也自今牧守溫仁清儉克已奉公者可久於其任歲積有成遷位一級其有貪殘非道侵削黎庶者雖在官甫爾必加黜罰著之於令永爲彝準詔以代郡事同豐沛代民先配邊戍者皆免之

三年春正月庚辰詔員外散騎常侍崔演使於劉昱丁亥改崇光宮爲寧光宮戊戌太上皇帝還至雲中是月相州執送妖人榮永安於京師斬之詔赦其支黨二月戊申高麗契丹國並遣使朝貢

癸丑詔牧守令長勤率百姓無令失時同部之內貧富相通家有兼牛通借無者若不從詔一門之內終身不仕守宰不督察免所居官戊午太上皇帝至自北討飲至策勲告於宗廟死王事者復其家詔畿內民從役死事者郡縣爲迎喪給以葬費甲戌詔縣令能靜一縣劫盜者兼治二縣卽食其祿能靜二縣者兼治三縣三年遷爲郡守二千石能靜二郡上至三郡亦如之三年遷爲刺史三月壬午詔諸倉囤穀麥充積者出賜貧民夏四月戊申詔假司空上黨王長孫觀等討吐谷渾拾寅壬子契丹國遣使朝貢詔以孔子二十八世孫魯郡孔乘爲崇聖大夫給十戶以供洒掃六月甲子詔曰往年縣召民秀二人問以守宰治狀善惡具聞將加賞罰而賞者未幾罪者衆多肆法傷生情所未忍今特垂寬恕之恩申以解網之惠諸爲民所矧者特原其罪盡可代之秋七月詔河

南六州之民戶收絹一匹綿一斤租三十石乙亥行幸陰山蠕蠕

寇敦煌鎮將樂洛生擊破之事具蠕蠕傳劉昱遣將寇緣淮諸鎮

徐州刺史淮陽公尉元擊走之八月己酉高麗庫莫奚國並遣使

朝獻庚申帝從太上皇帝幸河西拾寅謝罪請降許之九月辛巳車

駕並還宮乙亥劉昱遣使朝貢己亥詔曰自今京師及天下之囚

罪未分判在獄致死無近親者公給衣衾棺槨葬埋之不得曝露

辛丑詔遣使者十人循行州郡檢括戶口其有仍隱不出者州郡

縣戶主並論如律庫莫奚國遣使朝獻冬十月太上皇帝親將南

討詔州郡之民十丁取一以充行戶收租五十石以備軍糧悉萬

斤國遣使朝獻武都王反攻仇池詔長孫觀仍回師討之十有一

月戊寅詔以河南七州牧守多不奉法致新邦之民莫能上達遣

使者觀風察獄黜陟幽明其有鰥寡孤獨貧不自存者復其雜徭

年八十已上一子不從役力田孝悌才器有益於時信義著於鄉閭者具以名聞癸巳太上皇帝南巡至於懷州所過問民疾苦賜高年孝悌力田布帛十有二月庚戌詔關外苑囿聽民樵採壬子蠕蠕犯邊柔玄鎮二部勅勒叛應之癸丑沙門慧隱謀反伏誅是歲州鎮十一水旱丐民田租開倉賑恤相州民餓死者二千八百四十五人吐谷渾部內羌民鍾豈渴干等二千三百戶內附是年妖人劉舉自稱天子齊州刺史武昌王平原捕斬之

四年春正月丁丑侍中太尉隴西王源賀以病辭位辛巳粟特國遣使朝獻二月甲辰太上皇帝至自南巡辛亥吐谷渾拾寅遣子費斗斤入侍并獻方物辛未禁斷寒食三月丁亥詔員外散騎常侍許赤虎使於劉昱高麗吐谷渾曹利諸國各遣使朝貢夏五月甲戌蠕蠕國遣使朝貢六月乙卯詔曰朕應歷數開一之期屬千

載光熙之運雖仰嚴誨猶懼德化不寬至有門房之誅下民

莫不顧親戚一人爲惡殃及合門朕爲民父母深所愍恤自今以

後非謀反大逆于紀外奔罪止其身而已今德被珠方文軌將一

宵刑寬禁不亦善乎闕悉國遣使朝貢秋七月庚子高麗國遣使

朝獻已卯曲赦仇池癸巳蠕蠕寇敦煌鎮將尉多入破之八月

庚子吐谷渾國遣使朝獻戊申大閱於北郊九月以劉昱內相攻

戰詔將軍元蘭等五將三萬騎及假東陽王丕爲後繼伐蜀漢丙

子契丹庫莫奚地豆干諸國各遣使朝獻冬十月庚子劉昱遣使

朝貢十有一月分遣侍臣循河南七州觀察風俗撫慰初附戊寅

吐谷渾國遣使朝獻是歲州鎮十三大饑丐民田租開倉賑之十

有二月詔西征吐谷渾兵在句律城初叛軍者斬次分配柔玄武

川二鎮斬者千餘人

五年春二月庚子高麗國遣使朝獻癸丑詔定考課明黜陟閏月
戊午吐谷渾國遣使朝獻夏四月丁丑龜茲國遣使朝獻癸未詔
天下賦調縣專督集牧守對檢送京師違者免所居官詔禁畜鷹
鷄開相告之制五月丁酉契丹庫莫奚國各遣使獻名馬丙午詔
員外散騎常侍許赤虎使於劉昱丁未幸武州山辛酉幸車輪山
六月庚午禁殺牛馬壬申曲赦京師死罪遣備蠕蠕秋八月丁卯
高麗吐谷渾地豆于諸國遣使朝獻九月癸卯洛州人賈伯奴豫
州人田智度聚黨千餘人伯奴稱恒農王智度稱上洛王夜攻洛
州州郡擊之斬伯奴於緱氏執智度送京師冬十月蠕蠕遣使
朝獻太上皇帝大闕於北郊十有二月丙寅建昌王長樂改封安
樂王己丑城陽王長壽薨庚寅劉昱遣使朝貢

承明元年春二月蠕蠕高麗庫莫奚波斯諸國並遣使朝貢是月

司空東郡王陸定國坐事免官爵爲兵夏五月冀州武邑民朱伏
龍聚衆自稱南平王郡縣捕斬之蠕蠕國遣使朝貢六月甲子詔
中外戒嚴分京師見兵爲三等第一軍出遣第一兵二等兵亦如
之辛未太上皇帝崩壬申大赦改年大司馬大將軍安城王萬安
國坐矯詔殺神部長奚買奴於苑中賜死戊寅征西大將軍安樂
王長樂爲太尉尚書左僕射南平公目辰爲司徒進封宜都王南
部尚書李訢爲司空尊皇太后爲太皇太后臨朝稱制秋七月甲
辰追尊皇妣李貴人爲思皇后以汝陰王天賜爲征西大將軍儀
同三司高麗庫莫奚國並遣使朝貢濮陽王孔雀有罪賜死八月
甲子詔曰朕猥承前緒纂戎洪烈思隆先志緝熙政道羣公卿士
其各勉厥心匡朕不逮諸有便民利國者具狀以聞壬午蠕蠕國
遣使朝貢甲申以長安蠶多死丐民歲賦之半九月丁亥曲赦

京師高麗庫莫奚契丹諸國並遣使朝獻癸丑宕昌悉萬斤國並遣使朝貢冬十月丁巳起七寶永安行殿乙丑進征西大將軍假東陽王元丕爵爲正王巳未詔曰朕纂承皇極照臨萬方思闡遐風光被兆庶使朝有不諱之音野無自蔽之響疇咨帝載詢及芻蕘自今已後羣官卿士下及吏民各聽上書直言極諫勿有所隱諸有便宜益治利民可以正風俗者有司以聞朕將親覽與三事大夫論其可否裁而用之辛未與駕幸建明佛寺大宥罪人濟南公羅拔進爵爲王十有一月蠕蠕國遣使朝貢戊子以太尉安樂王長樂爲定州刺史京兆王子推爲青州刺史司空李訢爲徐州刺史並開府儀同三司

太和元年春正月乙酉朔詔曰朕夙承寶業懼不堪荷而天貺其臻地瑞並應風和氣曉天人交協豈朕冲昧所能致哉實賴神祇

七廟降福之助今三正告初祇感交切宜因陽始協興革元其改今號爲太和元年辛亥詔曰今牧民者與朕共治天下也宜簡以循役先之勸獎相其水陸務盡地利使農夫外布桑婦內勤若輕有徵發致奪民時以侵擅論民有不從長教悔於農桑者加以罪刑起太和安昌二殿巳酉秦州略陽民王元壽聚衆五千餘家自號爲衝天王雲中饑開倉賑恤二月丙寅漢川民泉會譚西等相率內屬處之并州辛未秦益二州刺史武都公尉洛侯討破元壽獲其妻子送京師癸未高麗契丹庫莫奚國各遣使朝獻三月庚子徵征西大將軍雍州刺史東陽王丕爲司徒丙午詔曰朕政治多闕災眚屢興去年生疫死傷大半耕墾之利常有虧損今東作旣興人須肄業其勅在所督課田農有牛者加勤於常歲無牛者倍傭於餘年一夫制治田四十畝中男二十畝無令人有餘力地

有遺利庫莫奚契丹國各遣使朝獻夏四月丙寅蠕蠕國遣使朝
貢丁卯幸白登山壬申幸崞山樂安王良薨詔復前東郡王陸定
國官爵五月乙酉車駕祈雨於武州山俄而澍雨大洽蠕蠕國遣
使朝貢秋七月壬辰侍中開府儀同三司青州刺史京兆王子推
薨唐子定三等死刑己酉太和安昌二殿成起朱明思賢門是月
劉昱死弟準備立八月壬子大赦天下丙子詔曰工商皂隸各有
厥分而有司縱濫或染清流自今戶內有工役者推上本部承已
下準次而授若階藉元勲以勞定國者不從此制戊寅劉準遣使
朝貢九月癸未蠕蠕國遣使朝貢乙酉詔羣臣定律令於太華殿
辛卯高麗國遣使朝貢庚子起永樂遊觀殿於北苑穿神淵池車
多羅西天竺舍衛疊伏羅諸國各遣使朝貢冬十月癸酉宴京邑
耆老年七十已上於太華殿賜以衣服是月庫莫奚契丹國各遣
使朝獻又詔七十已上一子不從役龜茲國遣使朝獻劉準葭蘆
戍主楊文度遣弟鼠襲陷仇池丙子誅徐州刺史李訢庫莫奚契
丹國各遣使朝貢十有一月癸未詔征西將軍廣川公皮懽喜鎮
西將軍梁醜奴平西將軍楊靈珍等率衆四萬討楊鼠乙酉吐谷
渾國遣使朝獻丁亥懷州民伊祁苟初自稱堯後應王聚衆於重
山洛州刺史馮熙討滅之閏月懽喜等軍到建安楊鼠棄城南走
癸亥粟提婆國遣使朝獻庚子詔員外散騎常侍李長仁使於劉
準十有二月壬寅懽喜攻陷葭蘆斬文度傳首京師甲辰員闕吐
谷渾並遣使朝貢丁未詔以州郡八水旱蝗民饑開倉賑恤以安
定王休爲儀同三司

二年春正月丁巳封昌黎王馮熙第二子始興爲北平王戊午吐
谷渾遣使朝獻二月丁亥行幸代之湯泉所過問民疾苦以宮人

賜貧民無妻者戊戌蠕蠕國遣使朝獻癸卯車駕還宮三月丙子以河南公梁彌機爲宕昌王夏四月甲申幸崑崙山丁亥還宮巳丑劉準遣使朝貢京師蝗甲辰祈天災於北苑親自禮焉減膳避正殿丙午澍雨大洽曲赦京師五月詔曰婚聘過禮則嫁娶有失時之弊厚葬送終則生者有糜費之苦聖王知其如此故申之以禮數約之以法禁廼者民漸奢尚婚葬越軌致貧富相高貴賤無別又皇族貴戚及士民之家不惟氏族高下與非類婚偶先帝親發明詔爲之科禁而百姓習常仍不肅改朕今憲章舊典祇案先制著之律令永爲定準犯者以違制論六月巳丑幸鹿野苑庚子皇叔若薨秋七月戊辰龜茲國遣使獻名駒七十頭劉準遣將寇仇池陰平太守楊廣香擊走之八月分遣使者考察守宰問民疾苦丙戌詔罷諸州禽獸之貢丁亥勿吉國遣使朝獻九月丙辰曲赦京師龜茲國遣使獻大馬名駒珍寶甚衆冬十月壬辰詔員外散騎常侍鄭義使於劉準十有一月庚戌詔曰懸爵於朝而有功者必縻其賞懸刑於市而有罪者必罹其辜斯乃古今之成典治道之寶要諸州刺史牧民之官自頃以來遂各怠慢縱姦納賂背公緣私致令賊盜並興侵劫滋甚姦究之聲屢聞朕眇承太平之運屬千載之期恩光洪緒惟新庶績亦望蕃翰羣司敦德宣惠以助沖人共成斯美幸克巳復禮思愆改過使寡昧無愧於祖宗百姓見德於當世有司明爲條禁稱朕意焉十有一月癸巳誅南郡王李惠是歲州鎮二十餘水旱民饑開倉賑恤

三年春正月癸丑坤德六合殿成庚申詔罷行察官二月辛巳帝太皇太后幸代郡溫泉問民疾苦鰥貧者以宮女妻之巳亥還宮丁亥乾象六合殿成三月甲辰曲赦京師戊午吐谷渾高麗國各

遣使朝獻夏四月壬申劉準遣使朝獻癸未樂良王樂平薨辛卯
蠕蠕國遣使朝獻丙申幸崞山己亥還宮庚子淮陽公尉元進爵
爲王吐谷渾國遣使獻羖牛五十頭雍州刺史宜都王日辰有罪
賜死五月丁巳帝祈雨於北苑閉陽門是日澍雨大洽辛酉詔曰
昔四代養老問道乞言朕雖沖昧每尚其美今賜國老各衣一襲
綿五斤絹布各五匹六月辛未以雍州民饑開倉賑恤起文石室
靈泉殿於方山秋七月壬寅詔宮人年老及疾病者免之八月壬
申詔羣臣直言盡規靡有所隱乙亥幸方山起思遠佛寺丁丑還
宮九月壬子以侍中司徒東陽王丕爲太尉侍中尚書右僕射趙
郡公陳建爲司徒進爵魏郡王侍中尚書河南公苟頹爲司空進
爵河東王侍中尚書太原公王叔進爵中山王侍中尚書龍東公
張祐進爵新平王己未定州刺史安樂王長樂有罪徵詣京師賜
死庚申隴西王源賀薨高麗吐谷渾地豆于契丹庫莫奚通茲諸
國各遣使朝獻冬十月己巳朔大赦天下十一月癸卯賜京師
貧窮高年疾患不能自存者衣服布帛各有差癸丑進假梁郡公
元嘉爵爲假王督二將出淮陰隴西公元琛三將出廣陵河東公
薛虎子三將出壽春蠕蠕率騎十餘萬南寇至塞而還十有二月
粟特州逸河龔疊伏羅員闕悉萬斤諸國各遣使朝貢是年島夷
蕭道成廢其主劉準而僭立自號曰齊

四年春正月癸卯乾象六合殿成洮陽羌叛枹罕鎮將討平之隴
西公元琛等攻尅蕭道成馬頭戍乙卯廣川王略薨雍州氏齊男
王反殺美陽令州郡捕斬之丁巳罷畜鷹鷄之所以其地爲報德
佛寺戊午襄城王韓頹有罪削爵徙邊蕭道成徐州刺史崔文仲
寇淮北陷荏眉戊二月遣尚書游明根率騎二千南討癸巳詔曰

朕承乾緒君臨海內夙興昧旦如履薄冰今東作方興庶類萌動
品物資生膏雨不降歲一不登百姓饑乏朕甚懼焉其敕天下祀
山川羣神及能興雲雨者修飾祠堂薦以牲璧民有疾苦所在存
問三月丙午詔車騎大將軍馮熙督衆迎還假梁郡王嘉等諸軍
乙卯蠕蠕國遣使朝貢四月乙卯幸廷尉籍坊二獄引見諸囚詔
曰廷尉者天下之平民命之所懸也朕得惟刑之恤者仗獄官之
稱其任也一夫不耕將或受其餒一婦不織將或受其寒今農時
要月百姓肆力之秋而愚民陷罪者甚衆宜隨輕重決遣以赴耕
耘之業辛巳幸白登山甲申賜天下貧人一戶之內無雜財穀帛
者廩一年五月丙申朔幸火山壬寅還宮六月丁卯以澍雨大洽
曲赦京師以紬綾絹布百萬匹及南伐所俘賜王公已下秋七月
辛亥行幸火山壬子改作東明觀詔會京師耆老賜錦綵衣服几杖
稻米蜜麵復家人不徭役悉萬斤國遣使朝貢閏月丁亥幸虎園
親錄囚徒輕者皆免之王辰頓丘王李鍾葵有罪賜死蕭道成角
城戍主請舉城內屬八月丁酉詔徐州刺史假梁郡王嘉赴接之
又遣平南將軍郎大檀三將出朐城將軍白吐頭二將出海西將
軍元泰二將出連口將軍封匹三將出角城鎮南將軍賀羅出下
蔡甲辰幸方山戊申幸武州山石窟寺庚戌還宮乙卯詔諸州置
冰室蕭道成梁州刺史崔慧景遣長史裴叔保率衆寇武興關城
氏帥楊鼠擊破之叔保還南鄭九月蕭道成汝南太守常元直龍
驤將軍胡青荀率戶內屬乙亥思義殿成壬午東明觀成戊子詔
曰隆寒雪降諸在徽纆及轉輸在都或有凍餒朕用愍焉可遣侍
臣詣廷尉獄及有囚之所周巡省察飢寒者給以衣食桎梏者代
以輕鑕假梁郡王嘉破蕭道成將盧紹之玄元度於朐山其下蔡

戊主棄城遁走冬十月丁未詔昌黎王馮熙爲西道都督與征南將軍桓誕出義陽鎮南將軍賀羅自下蔡東出鍾離蘭陵民桓富殺其縣令與昌慮桓和北連太山羣盜張和顏等聚黨保五固推司馬朗之爲主詔淮陽王尉元等討之是歲詔以州鎮十八水旱民饑開倉賑恤

五年春正月己卯車駕南巡丁亥至中山親見高年問民疾苦二月辛卯朔大赦天下賜孝悌力田孤貧不能自存者穀帛有差免官人年老者還其所親丁酉車駕幸信都存問如中山癸卯還中山已酉講武于唐水之陽庚戌車駕還都沙門法秀謀反伏誅南征諸將擊破蕭道成游擊將軍桓康於淮陽道成豫州刺史垣崇祖寇下蔡昌黎王馮熙擊破之假梁郡王嘉大破道成將俘獲三萬餘口送京師三月辛酉朔車駕幸肆州癸亥講武于雲水之陽

所經考察守宰加以黜陟己巳車駕還宮詔曰法秀妖詐亂常妄說符瑞蘭臺御史張求等一百餘人招結奴隸謀爲大逆有司科以族誅誠合刑憲且矜愚重命猶所弗忍其五族者降止同祖三族止一門門誅止身夏四月己亥行幸方山建永固石室於山上立碑於石室之庭又銘太皇太后終制于金冊又起鑒玄殿壬子以南俘萬餘口班賜羣臣甲寅詔曰時雨不需春苗萎悴諸有骸骨之處皆敕埋藏勿令露見有神祇之所悉可禱祈任城王雲薨五月庚申朔詔曰廼者邊兵屢動勞役未息百姓因之輕陷刑網獄訟煩興四民失業朕每念之用傷懷抱農時要月民須肆力其敕天下勿使有留獄久囚壬戌鄧至國遣使朝貢庚午青州主簿崔次恩聚衆謀叛州軍擊之次恩走郁洲六月甲辰中山王獻薨戊午封皇叔簡爲齊郡王猛爲安豐王秋七月甲子蕭道成遣使

朝貢辛酉蠕蠕別帥他稽率衆內附甲戌班乞養雜戶及戶籍之制五條九月庚子閱武於南郊大饗羣臣蕭道成使車僧朗以班在劉準使殷靈誕之後辭不就席劉準降人解奉君刀僧朗於會中詔誅奉君等乙亥封昌黎王馮熙世子誕爲南平王兗州斬司馬朗之傳首京師冬十月癸卯蠕蠕國遣使朝貢十有二月癸巳詔以州鎮十二民饑開倉賑恤

六年春正月甲戌大赦天下二月辛卯詔曰靈丘郡土旣褊瑯又諸州路衝官私所經供費非一往年巡行見其勞瘁可復民租調十五年癸巳白蘭王吐谷渾翼世以誣罔伏誅乙未詔曰蕭道成逆亂江淮戎旗頻舉七州之民旣有征運之勞深乖輕徭之義朕甚愍之其復常調三年戊申地豆于國遣使朝貢癸丑賜王公已下清勤著稱者穀帛有差三月庚辰行幸虎園詔曰虎狼猛暴食

肉殘生取捕之日每多傷害旣無所益損費良多從今勿復捕貢辛巳幸武州山石窟寺賜貧老者衣服壬午幸方山是月蕭道成死子贍僭立夏四月甲辰賜畿內鰥寡孤獨不能自存者粟帛有差六月蠕蠕國遣使朝貢秋七月癸州郡五萬人治靈丘道八月癸未朔分遣大使巡行天下遭水之處丐民租賦貧儉不自存者賜以粟帛庚子罷山澤之禁九月辛酉以氏楊後起爲武都王冬十有一月乙卯吐谷渾國遣使朝貢十有二月丁亥詔曰朕以寡薄政缺平和不能仰緝緯象蠲茲六沴去秋淫雨洪水爲災百姓嗷然朕用嗟愍故遣使者循方賑恤而牧守不思利民之道期於取辦愛毛反裘甚無謂也今課督未入及將來租算一以丐之有司勉加勸課以要來穰稱朕意焉

七年春正月庚申詔曰朕每思知百姓之所疾苦以增修寬政而

明不燭遠實有缺焉故具問守宰苛虐之狀於州郡使者秀孝計
掾而對多不實甚乖朕虛求之意宜案以大辟明罔上必誅然情
猶未忍可恕罪聽歸申下天下使知後犯無恕丁卯詔青齊光東
徐四州之民戶運倉粟二十萬石送瑕丘琅邪復租算一年三月
甲戌以冀定二州民飢詔郡縣爲粥於路以食之又弛關津之禁
任其去來夏四月庚子幸崞山賜所過鰥寡不能自存者衣服粟
帛壬寅車駕還宮閏月癸丑皇子生大赦天下五月戊寅朔幸武
州山石窟佛寺六月定州上言爲粥給飢人所活九十四萬七千
餘口秋七月丁丑帝太皇太后幸神淵池甲申幸方山詔假員外
散騎常侍李彪員外郎蘭英使於蕭贖濟南王羅拔改封趙郡王
九月壬寅詔曰朕承祖宗夙夜惟懼然聽政之際猶慮未周至於
案文審獄思聞已過自今羣官奏事當獻可替否無或面從俾朕
之過彰於遠近冀州上言爲粥給飢民所活七十五萬一千七百
餘口冬十月戊午皇信堂成十有一月辛丑蕭贖遣使朝貢十有
二月癸丑詔曰淳風行於上古禮化用乎近葉是以夏殷不嫌一
族之婚周世始絕同姓之娶斯皆教隨時設治因事改者也皇運
初基中原未混撥亂經綸日不暇給古風遺樸未遑釐改後遂因
循迄茲莫變朕屬百年之期當後仁之政思易質舊式昭惟新自
今悉禁絕之有犯以不道論庚午開林慮山禁與民共之詔以州
鎮十三民飢開倉賑恤

八年春正月詔隴西公元琛尚書陸叡爲東西二道大使褒善罰
惡二月蠕蠕國遣使朝獻夏四月甲寅幸方山戊午車駕還宮庚
申行幸旋鴻池遂幸崞山丁卯還宮五月己卯詔賑賜河南七州
戍兵甲申詔員外散騎常侍李彪員外郎蘭英使於蕭贖六月丁

卯詔曰置官班祿行之尚矣周禮有食祿之典二漢著受俸之秩逮于魏晉莫不聿稽往憲以經綸治道自中原喪亂茲制中絕先朝因循未遑釐改朕永鑒四方求民之瘼夙興昧旦至於憂勤故憲章舊典始班俸祿罷諸商人以簡民事戶增調三匹穀二斛九斗以爲官司之祿均預調爲二匹之賦卽兼商用雖有一時之煩終克永逸之益祿行之後賦滿一匹者死變法改度宜爲更始其大赦天下與之惟新戊辰武州水泛濫壞民居舍秋七月乙未行幸方山石窟寺八月甲辰詔曰帝業至重非廣詢無以致治王務至繁非博採無以興功先王知其如此故虛已以求過明恕以思咎是以諫鼓置於堯世謗木立於舜庭用能耳目四達庶類咸熙朕承累聖之洪基屬千載之昌運每布遐風曷行前式承明之初班下內外聽人各盡忠以補其闕中言雖宜允稱者少故變時法

達遵古典班制俸祿改更刑書寬猛未允人或異議思言者莫由申情求諫者無因自達故令上明不周下情壅塞今制百辟卿士工商吏民各上便宜利民益治損化傷政直言極諫勿有所隱務令辭無煩華理從簡實朕將親覽以知世事之要使言之者無罪聞之者足以爲戒九月甲午蕭贍遣使朝貢戊戌詔曰俸制已立宜時班行其以十月爲首每季一請於是內外百官受祿有差冬十月高麗國遣使朝貢蕭贍雙城戍主王繼宗內屬十有一月乙未詔員外散騎常侍李彪員外郎蘭英使於蕭贍十有二月詔以州鎮十五水旱民饑遣使者循行問所疾苦開倉賑恤

九年春正月戊寅詔曰圖讖之興起於三季旣非經國之典徒爲妖邪所憑自今圖讖祕緯及名爲孔子閉房記者一皆焚之留者以大辟論又諸巫覡假稱神鬼妄說吉凶及委巷諸卜非墳典所

載者嚴加禁斷癸未大饗羣臣于太華殿班賜皇誥二月己亥制皇子封王者皇孫及曾孫紹封者皇女封者歲祿各有差以廣陽王建第二子嘉紹建後爲廣陽王乙巳詔曰昔之哲王莫不博採下情勤求箴諫建設旌鼓詢納芻蕘朕班祿刪刑慮不周允虛懷讜直思顯洪猷百司卿士及工商吏民其各上書極諫靡有所隱三月丙申宕昌國遣使朝貢封皇弟禧爲咸陽王幹爲河南王羽爲廣陵王雍爲潁川王勰爲始平王諡爲北海王夏四月癸丑幸方山甲寅還宮五月高麗國及蕭曠並遣使朝貢六月辛亥幸方山遂幸靈泉池丁巳還宮秋七月丙寅朔新作諸門癸未遣使拜宕昌王梁彌機兄子彌承爲其國王戊子幸魚池登青原岡甲午還宮八月己亥行幸彌澤甲寅登牛頭山庚申詔曰數州災水饑饉荐臻致有賣鬻男女者人之所譴在予一人而百姓無辜橫罹

艱毒朕用殷憂夕惕忘食與寢今自太和六年已來買定冀幽相四州飢民良口者盡還所親雖娉爲妻妾遇之非理情不樂者亦離之甲子還宮冬十月丁未詔曰朕承乾在位十有五年每覽先王之典經綸百氏儲畜旣積黎元永安爰暨季葉斯道陵替富強者并兼山澤貧弱者望絕一廛致令地有遺利民無餘財或爭畝畔以亡身或因飢饉以棄業而欲天下太平百姓豐足安可得哉今遣使者循行州郡與牧守均給天下之田還受以生死爲斷勸課農桑興富民之本戊申高麗吐谷渾國並遣使朝貢辛酉侍中司徒魏郡王陳建薨詔員外散騎常侍李彪尚書郎公孫阿六頭使蕭曠十有二月乙卯侍中淮南王他爲司徒蠕蠕犯塞詔任城王澄率衆討之是年京師及州鎮十三水旱傷稼宕昌高麗吐谷渾等國並遣使朝貢

魏書卷七上 高祖紀第七上

終

魏書卷七下

高祖紀第七下

魏書卷七下
高祖紀第七下

十年春正月癸亥朔帝始服袞冕朝饗萬國壬午蠕蠕犯塞二月
甲戌初立黨里隣三長定民戶籍三月丙申蠕蠕國遣使朝貢庚
申蕭蹟遣使朝貢夏四月辛酉朔始制五等公服甲子帝初以法
服御輦祀於西郊癸酉幸靈泉池戊寅車駕還宮是月高麗吐谷
渾國並遣使朝貢六月辛酉幸方山己卯名皇子曰恂大赦天下
秋七月戊戌幸方山八月乙亥給尚書五等品爵已上朱衣玉珮
大小組綬九月辛卯詔起明堂辟雍冬十月癸酉有司議依故事
配始祖於南郊十有一月議定州郡縣官依戶給俸十有二月壬
申蠕蠕犯塞癸未勿吉國遣使朝貢乙酉詔以汝南潁川大饑丐
民田租開倉賑恤

十有一年春正月丁亥朔詔定樂章非雅者除之二月甲子詔以
肆州之鴈門及代郡民饑開倉賑恤夏四月己未吐谷渾國遣使
朝貢五月壬辰幸靈泉池遂幸方山癸巳南平王渾薨甲午車駕
還宮詔復七廟子孫及外戚總服已上賦役無所與詔南部尚書
公孫文慶上谷張伏于率衆南討舞陰山關高麗吐谷渾國遣使
朝貢六月辛巳秦州民饑開倉賑恤癸未詔曰春旱至今野無青
草上天致譴寔由匪德百姓無辜將罹饑饉寤寐思求罔知所益
公卿內外股肱之臣謀猷所寄其極言無隱以救民瘼秋七月己
丑詔曰今年穀不登聽民出關就食遣使者造籍分遣去留所在
開倉賑恤八月壬申蠕蠕犯塞遣平原王陸叡討之事具蠕蠕傳
庚辰大議北伐進策者百有餘人辛巳罷山北苑以其地賜貧民
悉萬斤國遣使朝獻九月庚戌詔曰去夏以歲旱民饑須遣就食
舊籍雜亂難可分簡故依局割民閱戶造籍欲令去留得實賑貸
平均然廼者以來猶有餓死衢路無人收識良由本部不明籍貫
未實庫恤不周以至於此朕猥居民上聞用慨然可重遣精檢勿
令遺漏冬十月辛未詔罷起部無益之作出宮人不執機杼者甲
戌詔曰鄉飲禮廢則長幼之敘亂孟冬十月民閑歲隙宜於此時
導以德義可下諸州黨重之內推賢而長者教其里人父慈子孝
兄友弟順夫和妻柔不率長教者具以名聞十有一月丁未詔罷
尚方錦繡綾羅之工四民欲造任之無禁其御府衣服金銀珠玉
綾羅錦繡太官雜器太僕乘具內庫弓矢出其大半班賚百官及
京師士庶下至工商皂隸逮於六鎮戍士各有差戾申詔曰朕惟
上政不明令民陷身罪戾今寒氣勁切杖捶難任自今月至來年
孟夏不聽拷問罪人又歲既不登民多饑窘輕繫之囚宜速決了

無令薄罪久留獄犴十有二月詔祕書丞李彪著作郎崔光改析國記依紀傳之體是歲大饑詔所在開倉賑恤

十有二年春正月辛巳朔初建五牛旌旗乙未詔曰鎮戍流徙之人年滿七十孤單窮獨雖有妻妾而無子孫諸如此等聽解名還本諸犯死刑者父母祖父母年老更無成人子孫旁無親者具狀以聞二月壬戌高麗國遣使朝貢三月丁亥宕昌國遣使朝獻中散梁衆保等謀反伏誅夏四月高麗吐谷渾國並遣使朝貢蕭曠將陳顯達等寇邊甲寅詔豫州刺史元斤率衆禦之甲子大赦天下乙丑幸靈泉池丁卯遂幸方山己巳還宮陳顯達攻陷醴陽左僕射長樂王穆亮率騎一萬討之五月丁酉詔六鎮雲中河西及關內六郡各修水田通渠溉灌壬寅增置彝器於太廟六月甲寅宕昌國遣使朝貢秋七月己丑幸靈泉池遂幸方山己亥還宮

八月甲子勿吉國貢楛矢石磐九月吐谷渾宕昌國遣使朝貢甲午詔曰日月薄蝕陰陽之恒度耳聖人懼人君之放怠因之以設誠故稱日蝕修德月蝕修刑迺癸巳夜月蝕盡公卿以下宜愼刑罰以答天意丁酉起宣文堂經武殿癸卯侍中司徒淮南王他薨吐谷渾宕昌國與諸國各遣使朝貢閏月甲子帝觀築圓丘於南郊乙丑高麗國遣使朝貢辛未幸靈泉池癸酉還宮十有一月詔以二雍豫三州民饑開倉賑恤梁州刺史臨淮王提坐貪縱徙配北鎮十有二月蠕蠕伊吾戍主高羔子率衆三千以城內附以待中安豐王猛爲開府儀同三司

十有三年春正月辛亥車駕有事於圓丘於是初備太駕乙丑兗州民王伯恭聚衆勞山自稱齊王東萊鎮將孔伯孫討斬之戊辰蕭曠遣衆寇邊淮陽太守王僧雋擊走之二月壬午高麗國遣使

朝獻庚子引羣臣訪政道得失損益之宜三月甲子吐谷渾國遣使朝獻夏州刺史章武王彬以貪賕削封夏四月丁丑詔曰昇樓散物以資百姓至使人馬騰踐多有毀傷今可斷之以本所費之物賜窮老貧獨者丁亥幸靈泉池遂幸方山己丑還宮吐谷渾國遣使朝貢州鎮十五大饑詔所在開倉賑恤五月庚戌車駕有事於方澤六月汝陰王天賜南安王楨並坐贓賄免爲庶人高麗國遣使朝貢秋七月甲辰陰平國遣使朝貢丙寅幸靈泉池與羣臣御龍舟賦詩而罷立孔子廟於京師八月乙亥詔兼員外散騎常侍邢產兼員外散騎侍郎侯靈紹使於蕭隋戊子詔諸州鎮有水田之處各通溉灌遣匠者所在指授中尺國遣使朝貢九月丁未吐谷渾武興宕昌諸國各遣使朝獻出宮人以賜北鎮人貧鰥無妻者冬十月甲申高麗國遣使朝貢十有一月己未安豐王儒薨

十有二月丙子侍中司空河東王苟頽薨甲午蕭隋遣使朝貢己亥以尚書令尉元爲司徒左僕射穆亮爲司空是歲蠕蠕別帥叱呂勤率衆內附

十有四年春正月乙丑行幸方山二月辛未行幸靈泉池壬申還宮戊寅初詔定起居注制己卯詔遣侍臣循行州郡問民疾苦三月壬申吐谷渾宕昌武興陰平諸國並遣使朝貢夏四月地豆于頻犯塞甲戌征西大將軍陽平王熙擊走之甲午詔兼員外散騎常侍邢產兼員外散騎侍郎蘇季連使於蕭隋五月己酉庫莫奚犯塞安州都將襮龍兒擊走之沙門司馬惠御自言聖王謀破平原郡擒獲伏誅秋七月甲辰詔罷都牧雜制丙午行幸方山丙辰遂幸靈泉池高麗國遣使朝貢八月丙寅朔車駕還宮辛卯宕昌國遣使朝貢詔議國之行次九月癸丑太皇太后馮氏崩壬戌高

麗國遣使朝貢詔聽蕃鎮曾經內侍者前後奔赴冬十月戊辰詔曰自丁荼苦奄踰晦朔仰遵遺旨祖奠有期朕將親侍龍輿奉訣陵隧諸常從之具悉可停之其武衛之官防侍如法癸酉葬文明太皇太后於永固陵甲戌車駕謁永固陵羣臣固請公除帝不許已卯車駕謁永固陵庚辰帝居廬引見羣寮於太和殿太尉東陽王丕等據權制固請帝引古禮往復羣臣乃止詔在禮志京兆王太興有罪免官削爵詔曰公卿屢依金冊遺旨中代權式請過塋卽言朕思遵遠古終三年之制依禮旣虞卒哭此月三十一日授服以葛易麻旣衰服在上公卿不得獨釋於下故於朕之授服變從練禮已下復爲節降斟酌今古以制厥衷且取遺旨速除之一端粗申臣子罔極之巨痛癸未詔曰朕遠遵古式欲終三年之禮百辟羣官據金冊顧命將奪朕心從先朝之制朕仰惟金冊俯自

推省取諸二衷不許衆議以衰服過終四節之慕又奉聖訓聿修詰旨不敢闇嘿自居以曠機政庶不愆遺令之意差展哀慕之情普下州鎮長至三元絕告慶之禮甲申車駕謁永固陵辛卯詔曰羣官以萬機事重請求聽政朕仰祈遺命亦思無怠但哀慕纏綿心神迷塞未堪自力以親政事近侍先掌機衡者皆謀猷所寄且可任之如有疑事當時與論決十有一月甲寅詔曰垂及至節感慕崩摧凡在臣列誰不哽切內外職人先朝班次及諸方雜客冬至之日盡聽入臨三品以上衰服者至夕復臨其餘唯旦臨而已其拜哭之節一依別儀丁巳蕭躋遣使朝貢十有二月壬午詔依準丘井之式遣使與州郡宣行條制隱口漏丁卽聽附實若朋附豪勢陵抑孤弱罪有常刑

十五年春正月丁卯帝始聽政於皇信東室初分置左右史官吐

谷渾國遣使朝貢二月乙亥枹罕鎮將長孫百年請討吐谷渾所
置洮陽泥和二戍許之己丑蕭贖遣使朝貢三月甲辰車駕謁永
固陵己酉悉萬斤等五國遣使朝貢夏四月癸亥帝始進蔬食乙
丑謁永固陵自正月不雨至于癸酉有司奏祈百神詔曰昔成湯
遇旱齊景逢災並不由祈山川而致雨皆至誠發中澍潤千里萬
方有罪在予一人今普天喪恃幽顯同哀神若有靈猶應未忍安
饗何宜四氣未周便欲祀事唯當考躬責已以待天譴甲戌詔員
外散騎常侍李彪尚書郎公孫阿六頭使於蕭贖己卯經始明堂
改太廟五月己亥議改律令於東明觀折疑獄乙卯百年攻洮陽
泥和二戍克之俘獲三千餘人詔悉免歸高麗國遣使朝獻丙辰
詔遣五輅六月丁未濟陰王鬱以貪殘賜死秋七月乙丑謁永固
陵規建壽陵戊寅吐谷渾國遣使朝貢己卯詔議祖宗以道武爲

太祖乙酉車駕巡省京邑聽訟而還八月壬辰議養老又議肆類
上帝禋于六宗之禮帝親臨決詔郡國有時物可以薦宗廟者貢
之戊戌移道壇於桑乾之陰改曰崇虛寺己亥詔諸州舉秀才先
盡才學乙巳親定禘祫之禮丁巳議律令事仍省雜祀九月辛巳
蕭贖遣使朝貢壬午吐谷渾高麗宕昌鄧至諸國並遣使朝獻冬
十月庚寅車駕謁永固陵是月明堂太廟成十有一月丁卯遷七
廟神主於新廟乙亥大定官品戊寅考諸牧守詔假通直散騎常
侍李彪假散騎侍郎蔣少遊使蕭贖丙戌初罷小歲賀丁亥詔二
千石考在上上者假四品將軍賜乘黃馬一匹上中者五品將軍
上下者賜衣一襲十有二月壬辰遷社於內城之西癸巳頒賜刺
史已下衣冠以安定王休爲太傅齊郡王簡爲太保帝爲高麗王
璉舉哀於城東行宮己酉車駕迎春於東郊辛亥詔簡選樂官

十有六年春正月戊午朔饗羣臣於太華殿帝始爲王公興懸而不樂已未宗祀顯祖獻文皇帝於明堂以配上帝遂升靈臺以觀雲物降居青陽左个布政事每朔依以爲常辛酉始以太祖配南郊壬戌詔定行次以水承金甲子詔罷祖祿疑乙丑制諸遠屬非太祖子孫及異姓爲王皆降爲公公爲侯侯爲伯子男仍舊皆除將軍之號戊辰帝臨思義殿策問秀孝丙子始以孟月祭廟二月戊子帝移御永樂宮庚申壞太華殿經始太極殿辛卯罷寒食饗壬辰幸北部曹歷觀諸省巡省京邑聽理冤訟甲午初朝日于東郊遂以爲常丁酉詔祀唐堯於平陽虞舜於廣寧夏禹於安邑周文於洛陽丁未改謚宣尼曰文聖尼父告謚孔廟三月丁卯巡省京邑癸西省西郊郊天籍事乙亥車駕初迎氣南郊自此爲常辛巳以高麗王璉孫雲爲其國王蕭曠遣使朝貢是月高麗鄧王國

並遣使朝貢四月丁亥朔班新律令大赦天下癸巳契裔國遣使朝貢甲寅幸皇宗學親問博士經義五月癸未詔羣臣於皇信堂更定律條流徙限制帝親臨決之六月己丑高麗國遣使朝貢甲辰詔曰務農重穀王政所先勸率田疇君人常事今四氣休序時澤滂潤宜用天分地悉力東畝然京師之民遊食者衆不加督勸或芸耨失時可遣明使檢察勤惰以聞秋七月庚申吐谷渾世子賀虜頭來朝壬戌詔曰王者設官分職垂拱責成振綱舉綱衆目斯理朕德謝知人豈能一見鑒識徒乖爲君委授之義自今選舉每以季月本曹與吏部銓簡甲戌詔兼員外散騎常侍宋弁兼員外散騎侍郎房亮使於蕭曠八月庚寅車駕初夕月於西郊遂以爲常辛卯高麗國遣使朝貢乙未詔陽平王頤左僕射陸叡督十二將七萬騎北討蠕蠕丙午宕昌王奕彌承來朝司徒尉元以者

遜位已酉以尉元爲三老游明根爲五更又養國老庶老將行大射之禮雨不克成癸丑詔曰文武之道自古並行威福之施必也相藉故三五至仁尚有征伐之事夏殷明獻未捨兵甲之行然則天下雖平忘戰者殆不教民戰可謂棄之是以周立司馬之官漢置將軍之職皆所以輔文強武威肅四方者矣國家雖崇文以懷九服修武以寧八荒然於習武之方猶爲未盡今則訓文有典教武闕然將於馬射之前先行講武之式可勅有司豫修塲埒其列陣之儀五戎之數別俟後勅九月甲寅朔大序昭穆於明堂祀文明太皇太后於玄室辛未帝以文明太皇太后再周忌日哭於陵左絕膳三日哭不輟聲辛巳武興王楊集始來朝冬十月乙酉鄧至國遣使朝獻己亥以太傅安定王休爲大司馬特進馮誕爲司徒甲辰詔以功臣配饗太廟丙午高麗國遣使朝獻庚戌太極殿成大饗羣臣十有一月乙卯依古六寢權制三室以安昌殿爲內寢皇信堂爲中寢四下疑爲外寢十有二月賜京邑老人鳩杖是月蕭蹟遣使朝貢

十有七年春正月壬子朔帝饗百寮於太極殿乙丑詔曰夫駿奔入覲臣下之常式錫馬賜車君人之恒惠今諸邊君蕃胤皆虔集象魏趨觴紫庭貢饗旣畢言旋無遠各可依秩賜車旗衣馬務令優厚其武興宕昌各賜錦繒纁一千吐谷渾世子八百鄧至世子雖因緣至都亦宜資及可賜三百命數之差皆依別牒詔兼員外散騎侍郎劉承叔使於蕭蹟乙亥勿吉國遣使朝獻丙子以吐谷渾伏連籌爲其國王庚辰蠲大司馬安定王休太保齊郡王簡朔望之朝二月乙酉詔賜議律令之官各有差已酉車駕始藉田於都南三月戊辰改作後宮帝幸永興園徙御宣文堂吐谷渾國遣

使朝獻夏四月戊戌立皇后馮氏是月蕭贇征虜將軍直閤將軍
蠻酋田益宗率部落四千餘戶內屬五月乙卯宕昌陰平契丹庫
莫奚諸國並遣使朝獻壬戌宴四廟子孫於宣文堂帝親與之齒
行家人之禮甲子帝臨朝堂引見公卿已下決疑政錄囚徒丁丑
以旱撤膳襄陽蠻酋雷婆思等率一千三百餘戶內徙居於太和
川六月丙戌帝將南伐詔造河橋已丑詔免徐南豫陝岐東徐洛
豫七州軍糧乙未講武乙巳詔曰六職備於周經九列炳於漢晉
務必恆人守其職比百秩雖陳事典未叙自八元樹位躬加省
覽遠依往籍近採時宜作職員令二十一卷事迫戎期未善周悉
雖不足綱範萬度永垂不朽且可釋滯目前釐整時務須待軍回
更論所闕權可付外施行其有當局所疑而令文不載者隨事以
聞當更附之立皇子恂爲皇太子戊申高麗國遣使朝獻秋七月
癸丑以皇太子立詔賜民爲人後者爵一級爲公士曾爲吏屬者
爵二級爲上造鰥寡孤獨不能自存者人粟五斛戊午中外戒嚴
是月蕭贇死孫昭業僭立八月乙酉三老山陽郡公尉元薨丙戌
車駕煩於上帝遂臨尉元喪丁亥帝辭永固陵已丑車駕發京師
南伐步騎百餘萬太尉丕奏請以宮人從詔曰臨戎不語內事宜
停駕親問賜衣食終身戊申幸并州親見高年問所疾苦九月壬
子詔兼員外散騎常侍高聰兼員外散騎侍郎賈禎使於蕭昭業
丁巳詔以車駕所經傷民秋稼者畝給穀五斛戊辰濟河詔洛懷
并埏所過四州之民百年以上假縣令九十以上賜爵三級八十
以上賜爵二級七十以上賜爵一級鰥寡孤獨不能自存者粟人
五斛帛二匹孝弟廉義文武應求者皆以名聞又詔廝養之戶不

得與士民婚有文武之才積勞應進者同庶族例聽之庚午幸洛陽周巡故宮基址帝顧謂侍臣曰晉德不修早傾宗祀荒毀至此用傷朕懷遂詠黍離之詩爲之流涕壬申觀洛橋幸太學觀石經乙亥鄧至王像舒彭遣子舊詣闕朝貢并奉表求以位授舊詔許之丙子詔六軍發軫丁丑戎服執鞭御馬而出羣臣稽顙於馬前請停南伐帝乃止仍定遷都之計冬十月戊寅朔幸金墉城詔徵司空穆亮與尚書李冲將作大匠董爵經始洛京巳卯幸河南城乙酉幸豫州癸巳次於石濟乙未解嚴設壇於滑臺城東告行廟以遷都之意大赦天下起滑臺宮又詔京師及諸州從戎者賜爵一級應募者加二級主將加三級癸卯幸鄴城乙巳詔安定王休率從官迎家於代京車駕送於漳水上初帝之南伐也起宮殿於鄴西十有一月癸亥宮成徙御焉十有二月戊寅巡省六軍庚寅

陰平國遣使朝貢乙未詔隱恤軍士死亡疾病務令優給

十有八年春正月丁未朔朝羣臣於鄴宮澄鸞殿丁巳高麗國遣使朝獻癸亥車駕南巡詔相竟豫三州百年以上假縣令九十以上賜爵二級七十以上賜爵一級孤老鰥寡不能自存者賜粟五石帛二疋孝悌廉義文武應求者皆以名聞戊辰經殷比干之墓祭以太牢乙亥幸洛陽西宮二月巳丑行幸河陰規建方澤之所丙申河南王幹徙封趙郡潁川王雍徙封高陽壬寅車駕北巡癸卯濟河蕭昭業遣使朝貢甲辰詔天下喻以遷都之意閏月癸亥次句注陞南皇太子朝于蒲池壬申至平城宮癸酉臨朝堂部分遷留甲戌謁永固陵三月庚辰罷西郊祭壬辰帝臨太極殿諭在代羣臣以遷移之略夏五月乙亥詔罷五月五日七月七日饗六月巳巳詔兼員外散騎常侍盧昶兼員外散騎侍郎王清石使

於蕭昭業秋七月乙亥以宋王劉昶爲大將軍壬午侍中大司馬
安定王休薨辛卯高麗國遣使朝貢壬辰車駕北巡戊戌謁金陵
辛丑幸朔州是月島夷蕭鸞殺其主蕭昭業立昭業弟昭文八月
癸卯皇太子朝於行宮甲辰行幸陰山觀雲川丁未幸闕武臺臨
觀講武癸丑幸懷朔鎮己未幸武川鎮辛酉幸撫冥鎮甲子幸柔
玄鎮乙丑南還所過皆親見高年問民疾苦貧窘孤老賜以粟帛
丙寅詔六鎮及禦夷城人年八十以上而無子孫兄弟終身給其
廩粟七十以上家貧者各賜粟十斛又詔諸北城人年滿七十以
上及廢疾之徒校其元犯以準新律事當從坐者聽一身還鄉又
令一子扶養終命之後乃遣歸邊自餘之處如此之犯年八十以
上皆聽還戊辰車駕次旋鴻池庚午謁永固陵辛未還平城宮九
月壬申朔詔曰三載考績自古通經三考黜陟以彰能否今若待

三考然後黜陟可黜者不足爲遲可進者大成黜陟是以朕令三
載一考考卽黜陟欲令愚滯無妨於賢者才能不壅於下位各令
當曹考其優劣爲三等六品以下尚書重問五品以上朕將親與
公卿論其善惡上上者遷之下下者黜之中中者守其本任壬午
帝臨朝堂親加黜陟壬辰陰平王楊炆來朝冬十月甲辰以太尉
東陽王丕爲太傅戊申親告太廟奉遷神主辛亥車駕發平城宮
壬戌次於中山之唐湖乙丑分遣侍臣巡問民所疾苦己巳幸信
都庚午詔曰比聞緣邊之蠻多有竊掠致有父子乖離室家分絕
旣虧和氣有傷仁厚方一區宇子育萬姓若苟如此南人豈知胡
德哉可詔荆郢東荆三州勅勅蠻民勿有侵暴是月蕭鸞廢殺其
主蕭昭文而僭立十有一月辛未朔詔冀定二州民百年以上假
以縣令九十以上賜爵三級八十以上賜爵二級七十以上賜爵

一級鰥寡孤獨不能自存者賜以穀帛孝義廉貞文武應求者具以名聞丁丑車駕幸鄴甲申經比干之墓傷其忠而獲戾親爲弔文樹碑而刊之己丑車駕至洛陽蕭鸞雍州刺史曹虎據襄陽請降十有二月辛丑朔遣行征南將軍薛真度督四將出襄陽大將軍劉昶出義陽徐州刺史元衍出鍾離平南將軍劉藻出南鄭壬寅革衣服之制癸卯詔中外戒嚴戊申優復代遷之戶租賦三歲已酉詔王公侯伯子男開國食邑者王食半公三分食一侯伯四分食一子男五分食一辛亥車駕南伐丁卯詔郢豫二州之民百齡以上假縣令九十以上賜爵三級八十以上賜爵二級七十以上賜爵一級孤寡鰥老不能自存者賜以穀帛緣路之民復田租一歲孝悌廉義文武應求具以名聞戊辰車駕至懸瓠己巳詔壽陽鍾離馬頭之師所獲男女之口皆放還南

十有九年春正月辛未朔朝饗羣臣於懸瓠癸酉詔禁淮北之民不得侵掠犯者以大辟論甲戌檄喻蕭鸞丙子鸞龍陽縣開國侯王朗自渦陽來降壬午講武於汝水之西大賚六軍丙申平南將軍王肅頻破蕭鸞將擒其寧州刺史董鬱己亥車駕濟淮二月甲辰幸八公山路中雨甚詔去蓋見軍士病者親隱恤之戊申車駕巡淮而東民皆安堵租運屬路壬子高麗國遣使朝獻丙辰車駕至鍾離戊午軍士擒蕭鸞三千卒帝曰在君爲君其民何罪於是免歸辛酉車駕發鍾離將臨江水司徒馮誕薨壬戌乃詔班師丁卯遣使臨江數蕭鸞殺主自立之罪惡三月戊寅幸昭陽戊子太師馮熙薨乙未幸下邳鄧至國遣使朝貢夏四月庚子車駕幸彭城辛丑帝爲太師馮熙舉哀於行在所丁未曲赦徐豫二州其運漕之士復租賦三年辛亥詔賜百歲以上假縣令九十以上賜爵

三級八十以上賜爵二級七十以上賜爵一級孤寡老疾不能自
存者賜以穀帛德著丘園者具以名聞蕭鸞民降者給復十五年
癸丑幸小沛遣使以太牢祭漢高祖廟己未行幸瑕丘遣使以太
牢祠岱岳詔宿衛武官增位一級庚申行幸魯城親祠孔子廟辛
酉詔拜孔氏四人顏氏二人爲官詔兗州刺史舉部內士人才堪
軍國及守宰治行具以名聞又詔賜兗州民爵及粟帛如徐州又
詔選諸孔宗子一人封崇聖侯邑一百戶以奉孔子之祀又詔兗
州爲孔子起園柝修飾墳壝更建碑銘褒揚聖德戊辰行幸碭碭
太和廟成五月己巳城陽王鸞赭陽失利降爲定襄縣王廣川王
諧薨庚午遷文成皇后馮氏神主於太和廟甲戌行幸滑臺丙子
次于石濟庚辰皇太子朝於平桃城高麗吐谷渾國並遣使朝貢
癸未車駕至自南伐告于太廟甲申減閑官祿以裨軍國之用乙

酉行飲至之禮班賜有差甲午皇太子冠於廟六月己亥詔不得
以北俗之語言於朝廷若有違者免所居官辛丑詔復軍士從駕
渡淮者租賦三年癸卯詔皇太子赴平城宮壬子詔濟州東郡滎
陽及河南諸縣車駕所經者百年以上賜假縣令九十以上賜爵
三級八十以上賜爵二級七十以上賜爵一級孤老鰥寡不能自
存賜以穀帛孝悌廉義文武應求者具以名聞癸丑詔求天下遺
書祕閣所無有碑並時用者加以優賞乙卯曲赦梁州復民田租
三歲丙辰詔遷洛之民死葬河南不得還北於是代人南遷者悉
爲河南洛陽人戊午詔改長尺大斗依周禮制度班之天下八月
甲辰幸西宮路見壞冢露棺駐輦殮之乙巳詔選天下武勇之士
十五萬人爲羽林虎賁以充宿衛丁巳詔諸從兵從征被傷者皆
聽還本金墉宮成甲子引羣臣歷宴殿堂九月庚午六宮及文武

盡遷洛陽丙戌行幸鄴丁亥詔曰諸有舊墓銘記見存昭然爲時人所知者三公及位從公者去墓三十步尚書令僕九列十五步黃門五校十步各不聽墾殖壬辰遣黃門郎以太牢祭比干之墓乙未車駕還宮冬十月甲辰曲赦相州民百年以上假郡守九十以上假縣令八十以上賜爵三級七十以上賜爵二級孤老痼疾不能自存者賜以穀帛丙辰車駕至自鄴辛酉詔州郡諸有士庶經行修敏文思道逸才長吏治堪幹政事者以時發遣壬戌詔諸州牧精品屬官考其得失爲三等之科以聞將親覽而升降焉詔徐克光南青荆洛六州纂嚴戎備應須赴集十有一月行幸委粟山議定圓丘甲申有事於圓丘丙戌大赦天下十有二月乙未朔引見羣臣於光極堂且示品令爲大選之始辛酉驃騎大將軍司州牧咸陽王禧爲長兼太尉前南安王楨復本封以特進廣陵王羽爲征東大將軍開府儀同三司青州刺史甲子引見羣臣於光極堂班賜冠服

二十年春正月丁卯詔改姓爲元氏壬辰改封始平王勰爲彭城王以定襄縣王鸞復封城陽王二月辛丑帝幸華林聽訟於都亭壬寅詔自非金革聽終二年喪丙午詔畿內七十以上暮春赴京師將行養老之禮庚戌幸華林聽訟於都亭癸丑詔介山之邑聽爲寒食自餘禁斷三月丙寅宴羣臣及國老庶老於華林園詔國老黃耆以上假中散大夫郡守耆年以上假給事中縣令庶老直假郡縣各賜鳩杖衣裳丁丑詔諸州中正各舉其鄉之民望年五十以上守素衡門者授以令長夏四月甲辰廣州刺史薛法護南叛五月丙子詔曰農惟政首稷實民先澍雨豐洽所宜敦勵其令畿內嚴加課督墮業者申以楚撻力田者具以名聞丙戌初營方

澤於河陰遣使者以太牢祭漢光武及明章三帝陵又詔漢魏晉諸帝陵各禁方百步不得樵蘇踐蹋丁亥車駕有事於方澤七月廢皇后馮氏戊寅帝以久旱咸秩羣神自癸未不食至于乙酉是夜澍雨大洽丁亥詔曰炎陽爽節秋零卷澍在予之責實深悚慄故輟膳三晨以命上訴靈鑒誠款曲流雲液雖休勿休寧敢愆怠將有賢人湛德高士凝棲雖加銓採未能招致其精訪幽谷舉茲賢彥直言極諫匡予不及又邪佞毀朝固唯治蠹貪夫竊位大政以虧主者彈劾不肖明黜盜祿又法爲治要民命尤重在京之囚悉命條奏朕將親案以時議決又疾苦六極人神所矜宜時訪恤以拯窮廢鰥寡困乏不能自存者明加矜恤令得存濟又輕徭薄賦君人常理歲中恒役具以狀聞又夫婦之道生民所先仲春奔會禮有達式男女失時者以禮會之又京民始業農桑爲本田稼

多少課督不具以狀言八月壬辰朔幸華林園親錄囚徒咸降本罪二等決遣之戊戌車駕幸嵩高甲寅還宮丁巳南安王植薨幸華林園聽訟九月戊辰車駕閱武於小平津癸酉還宮丁亥將通洛水入穀帝親臨觀冬十月戊戌以代遷之士皆爲羽林虎賁司州之民十二夫調一吏爲四年更卒歲開番假以供公私力役已酉曲赦京師十有一月乙酉復封前汝陰王天賜孫景和爲汝陰王前京兆王太興爲西河王閏月丙辰右將軍元隆大破汾州叛胡十有二月甲子以西北州郡旱儉遣侍臣循察開倉賑恤乙丑開鹽池之禁與民共之丙寅廢皇太子恂爲庶人丁卯告太廟戊辰置常平倉恒州刺史穆泰等在州謀反遣行吏部尚書任城王澄案治之樂陵王思譽坐知泰陰謀不告削爵爲庶人

二十有一年春正月丙申立皇太子恪爲皇太子賜天下爲父後者

爵一級己亥遣兼侍中張彝崔光兼散騎常侍劉藻巡方省察問
民疾苦黜陟守宰宣揚風化乙巳車駕北巡二月壬戌次於太原
親見高年問所不便乙丑詔并州士人年六十以上假以郡守先
是定州民王金鈞訛言惑眾自稱應王丙寅州郡捕斬之癸酉車
駕至平城甲戌謁永固陵癸未行幸雲中三月庚寅車駕至自雲
中辛卯謁金陵乙未車駕南巡己酉次離石叛胡歸罪宥之甲寅
詔汾州民百年以上假縣令九十以上賜爵三級八十以上賜爵
二級七十以上賜爵一級丙辰車駕次平陽遣使者以太牢祭唐
堯夏四月庚申幸龍門遣使者以太牢祭夏禹癸亥行幸蒲坂遣
使者以太牢祭虞舜戊辰詔修堯舜禹廟辛未行幸長安壬申
武興王楊集始來朝乙亥親見高年問所疾苦丙子遣侍臣分省
縣邑賑賜穀帛戊寅幸未央殿阿房宮遂幸昆明池癸未大將軍

宋主劉昶薨丙戌遣使者以太牢祀漢帝諸陵五月丁亥朔衛大
國遣使朝貢己丑車駕東旋汎渭入河庚寅詔雍州士人百年以
上假華郡太守九十以上假荒郡八十以上假華縣令七十以上
假荒縣庶老以年各減一等七十以上賜爵三級其營船之夫賜
爵一級孤寡鰥貧窮病廢疾各賜帛二匹穀五斛其孝友德義文
學才幹悉仰貢舉壬辰遣使者以太牢祭周文王於鄠祭武王於
鎬癸卯遣使祭華嶽六月庚申車駕至自長安壬戌詔冀定瀛相
濟五州發卒二十萬將以南討癸亥司空穆亮遜位丁卯部分六
師以定行留秋七月甲午立昭儀馮氏爲皇后戊辰以前司空穆
亮爲征北大將軍開府儀同三司冀州刺史甲寅帝親爲羣臣講
喪服於清徽堂八月丙辰詔中外戒嚴壬戌立皇子愉爲京兆王
譯爲清河王懷爲廣平王壬申行幸河南城甲戌講武於華林園

庚辰車駕南討九月丙申詔曰哀貧恤老者所先鰥寡六疾尤
宜矜愍可勅司州洛陽之民年七十以上無子孫六十以上無妻
親貧不自存者給以衣食及不滿六十而有廢痼之疾無大功之
親窮困無以自療者皆於別坊遣醫救護給醫師四人豫請藥物
以療之丁酉詔河南尹李崇討梁州叛羌受征西源懷節度辛丑
帝留諸將攻赭陽引師而南癸卯至宛城夜襲其郭克之丁未車
駕發南陽留太尉咸陽王禧前將軍元英攻之巳酉車駕至新野
冬十月丁巳四面進攻不克詔左右軍築長圍以守之乙亥追廢
貞皇后林氏爲庶人十有一月甲午蕭鸞前軍將軍韓秀方弋陽
太守王副之後軍將軍趙祖悅等十五將來降丁酉太破賊軍於
沔北獲其將軍王伏保等於是民皆復業九十以上假以郡守六
十五以上假以縣令新野民張賄柵萬餘家拒守不下十有二月
庚申破之俘斬萬餘丁卯詔流徙之內皆勿決遣有登城之際令
其先鋒自效庚午車駕臨沔遂巡沔東還戊寅車駕還新野巳卯
親行營壘隱恤六軍蕭鸞將王曇紛等萬餘人寇南青州黃郭戍
戍主崔僧淵擊破之悉虜其衆以齊郡王子琛紹河間王若後高
昌國遣使朝貢

二十有二年春正月癸未朔朝饗羣臣於新野行宮丁亥拔新野
獲蕭鸞輔國將軍新野太守劉忌斬之於宛戊子鸞湖陽戍主蔡
道福棄城遁走辛卯鸞赭陽戍主成公期軍主胡松棄城遁走壬
辰鸞輔國將軍舞陰戍主黃瑤起及直閣將軍臺軍主鮑舉南鄉
太守席謙相尋遁走瑤起鮑舉爲軍人所獲送庚戌行幸南陽二
月乙卯進攻宛北城甲子拔之鸞冠軍將軍南陽太守房伯玉面
縛出降庚午車駕幸新野辛未詔以穰民首歸大順終始若一者

給復三十年標其所居曰歸義鄉次降者給復十五年三月壬午朔大破鸞平北將軍崔惠景黃門郎蕭衍軍於鄧城斬獲首虜二萬有餘庚寅行幸樊城觀兵襄沔耀武而還曲赦二荆魯陽郡鎮南將軍王肅攻鸞義陽鸞遣將裴叔業寇渦陽乙未詔將軍鄭思明嚴虛敬宇文福等三軍繼援辛丑行幸湖陽乙未次比陽戊申詔荊州諸郡之民初降次附復同穰縣辛亥行幸懸瓠夏四月甲寅從征武直之官進位三階文官二級外官一階庚午癸州郡兵二十萬人限八月中旬集懸瓠趙郡王幹薨五月丙午詔在征身喪者四品已下及卑兼之職給帛有差六月庚申詔諸王將士戰沒皆加優贈秋七月壬午詔曰朕以寡德屬茲靖亂實賴羣英凱清南夏宜約躬賞效以勸戎績后之私府便可損半六宮嬪御五服男女常恤恒供亦令減半在戎之親三分省一是日蕭鸞死子

寶卷僭立八月辛亥皇太子自京師來朝壬子蕭寶卷奉朝請鄧學擁其齊興郡內屬勅勒樹者相率反叛詔平北將軍江陽王繼都督北討諸軍事以討之壬戌高麗國遣使朝獻九月己亥帝以蕭鸞死禮不伐喪乃詔反旆庚子仍將北伐叛虜丙午車駕發懸瓠冬十月己酉朔曲赦二豫殊死已下復民田租一歲十有一月辛巳幸鄴十有二月甲寅以江陽王繼定勅勒乃詔班師

二十有三年春正月戊寅朔朝羣臣以帝疾瘳上壽大饗於澄鸞殿壬午幸西門豹祠遂歷漳水而還蕭寶卷遣太尉陳顯達冠捕州癸未詔前將軍元英討之乙酉車駕發鄴戊戌至自鄴庚子占於廟社癸卯行飲至策勲之禮甲辰大赦天下太保齊郡王簡薨二月辛亥以長兼太尉咸陽王禧爲正太尉癸亥以中軍大將軍彭城王勰爲司徒復樂陵王思譽本封癸酉顯達攻陷馬圈戊三

月庚辰車駕南伐癸未次梁城甲申以順陽被圍危急詔振武將軍慕容平城率騎五千赴之丙戌帝不豫司徒彭城王勰侍疾禁中且攝百揆丁酉車駕至馬圈詔鎮南大將軍廣陽王嘉斷均口邀顯達歸路戊戌頻戰破之其夜顯達及崔惠景曹虎等宵遁己亥收其戎資億計班賜六軍諸將追奔及於漢水斬獲及赴水而死者十八九斬寶卷左軍將軍張于達等賊將蔡道福成公期率數萬人棄順陽遁走庚子帝疾甚車駕北次穀塘原甲辰詔賜皇后馮氏死詔司徒勰徵太子於魯陽踐阼詔以侍中護軍將軍北海王詳爲司空公鎮南將軍王肅爲尚書令鎮南大將軍廣陽王嘉爲尚書左僕射尚書宋弁爲吏部尚書與侍中太尉公禧尚書右僕射任城王澄等六人輔政顧命宰輔曰粵介太尉司空尚書令左右僕射吏部尚書惟我太祖丕丕之業與四象齊茂累聖重

明屬鴻曆於寡昧兢兢業業思慕乃聖之遺蹤巡都嵩極定鼎河瀍庶南蕩甌吳復禮萬國以仰光七廟俯濟蒼生困窮早滅不永乃至公卿其善毗繼子隆我魏室不亦善歟可不勉之夏四月丙午朔帝崩於穀塘原之行宮時年三十三祕諱至魯陽發哀還京師上謚曰孝文皇帝廟曰高祖五月丙申葬長陵帝幼有至性年四歲顯祖曾患癰帝親自吮膿五歲受禪悲泣不能自勝顯祖問帝帝曰代親之感內切於心顯祖甚歎異之文明太后以帝聰聖後或不利於馮氏將謀廢帝乃於寒月單衣閉室絕食三朝召咸陽王禧將立之元丕穆泰李冲固諫乃止帝初不有憾唯深德丕等撫念諸弟始終曾無纖介悖睦九族禮敬俱深雖於大臣持法不縱然性寬慈每垂矜捨進食者曾以熱羹傷帝手又曾於食中得蟲穢之物並笑而恕之宦者先有譖帝於太后太后大怒杖帝

數十帝默然而受不自申明太后崩後亦不以介意聽覽政事莫不從善如流哀矜百姓恒思所以濟益天地五郊宗廟二分之禮常必躬親不以寒暑爲倦尚書奏案多自尋省百官大小無不留心務於周洽每言凡爲人君患於不均不能推誠御物苟能均誠胡越之人亦可親如兄弟常從容謂史官曰直書時事無諱國惡人君威福自己史復不書將何所懼南北征巡有司奏請治道帝曰粗修橋梁通輿馬便止不須去草剗令平也凡所脩造不得已而爲之不爲不急之事損民力也巡幸淮南如在內地軍事須伐民樹者必留絹以酬其直民稻粟無所傷踐諸有禁忌穰厭之方非典籍所載者一皆除罷雅好讀書手不釋卷五經之義覽之便講學不師受探其精奧史傳百家無不該涉善談莊老尤精釋義才藻富贍好爲文章詩賦銘頌任興而作有大文筆馬上口授及其成也不改一字自太和十年已後詔冊皆帝之文也自餘文章百有餘篇愛奇好士情如飢渴待納朝賢隨才輕重常寄以布素之意悠然玄邁不以世務嬰心又少而善射有膂力年十餘歲能以指彈碎羊髀骨及射禽獸莫不隨所志斃之至年十五便不復殺生射獵之事悉止性儉素常服澣濯之衣鞞勒鐵木而已帝之雅志皆此類也

史臣曰有魏始基代朔廓平南夏闢壤經世咸以威武爲業文教之事所未遑也高祖幼承洪緒早著睿聖之風時以文明攝事優游恭己玄覽獨得著自不言神契所標固以符於冥化及躬總大政一日萬幾十許年間曾不暇給殊途同歸百慮一致至夫生民所難行人倫之高迹雖尊居黃屋盡蹈之矣若乃欽明稽古協御大人帝王制作朝野軌度斟酌用捨煥乎其有文章海內生民咸

受耳日之賜加以雄才大略愛奇好士視下如傷役已利物亦無得而稱之其經緯天地豈虛謚也

魏書卷七下

高祖紀第七下

終

魏書卷七下

魏書卷八

世宗紀第八

世宗宣武皇帝諱恪高祖孝文皇帝第二子母曰高夫人初爲

日所逐避於牀下月化爲龍繞已數匝寤而驚悸旣而有娠太和

七年閏四月生帝於平城宮二十一年正月甲午立爲皇太子二

十三年夏四月丁巳卽皇帝位於魯陽大赦天下帝居諒闇委政

宰輔五月丙子朔高麗國遣使朝貢六月乙卯分遣侍臣巡行郡

國問民疾苦考察守令黜陟幽明文武應求道著丘園者皆加褒

禮戊辰追尊皇妣曰文昭皇后秋八月戊申遵遺詔高祖三夫人

已下悉歸家癸丑宮臣增位一級癸亥南徐州刺史沈陵南叛冬

十月辛未鄧至國王象舒彭來朝丙戌車駕謁長陵丁酉有事於

太廟十有一月幽州民王惠定聚衆反自稱明法皇帝刺史李肅

魏書卷八

世宗紀第八

捕斬之是歲州鎮十八水民饑分遣使者開倉賑恤高麗國遣使
朝獻

景明元年春正月壬寅車駕謁長陵乙巳大赦改年丁未蕭寶卷
豫州刺史裴叔業以壽春內屬驃騎大將軍彭城王勰帥車騎十
萬赴之二月戊戌復以彭城王勰爲司徒寶卷將胡松李居士率
衆萬餘屯宛陳伯之水軍泝淮而上以逼壽春夏四月丙申彭城
王勰車騎將軍王肅大破之斬首萬數己亥皇弟悅薨五月甲寅
以北鎮大饑遣兼侍中楊播巡撫賑恤六月丙子司徒彭城王勰
進位大司馬車騎將軍王肅加開府儀同三司癸未大陽蠻酋田
育丘等率戶內附秋七月寶卷又遣驃騎大將軍寇淮南庚子吐谷渾
國遣使朝獻八月乙酉彭城王勰破伯於肥口乙未高麗國遣
使朝貢九月乙丑東豫州刺史田益宗以寶卷將吳子陽鄧元起

於長風齊州民柳世明聚衆反冬十日丁卯朔車駕謁長陵庚寅
齊竟二州討世明平之丁亥改授彭城王勰爲司徒錄尚書事甲
午詔壽春置丘四萬人十有一月己亥荊州刺史桓道進攻寶卷
下峯戍拔之降者二千餘戶丁巳陽平王顥薨是歲十七州大饑
分遣使者開倉賑恤是冬島夷蕭衍起兵東下伐其主蕭寶卷
二年春正月丙申朔車駕謁長陵庚戌帝始親政遵遺詔聽司徒
彭城王勰以王歸第太尉咸陽王禧進位太保司空北海王詳爲
大將軍錄尚書事丁巳引見羣臣於太極前殿告以覽政之意辛
酉高麗國遣使朝獻壬戌以太保咸陽王禧領太尉大將軍廣陵
王羽爲司徒詔曰朕幼承寶曆艱憂在疚庶事不親風化未洽今
始覽政務義協惟新思使四方風從率善可分遣大使黜陟幽明
二月庚午宿衛之官進位一級甲戌大赦天下三月乙未朔詔曰

比年以來連有軍旅役務既多百姓彫弊宜時矜量以拯民瘼正調之外諸妨害損民一時蠲罷辛亥詔曰諸州刺史不親民事緩於督察郡縣稽逋旬月之間纔一覽決淹獄久訟動延時序百姓然嗟方成困弊尚書可明條制申下四方令日親庶事嚴勒守宰不得因循寬怠虧政壬戌詔曰治尚簡靜任責應事州府佐史除板稍多方成損弊無益政道又京師百司寮局殷雜官有閑長者亦同此例苟非稱要悉從蠲省青齊徐兗四州大饑民死者萬餘口是月蕭衍立寶卷弟南康王寶融爲主年號中興東赴建業夏五月壬子廣陵王羽薨壬戌太保咸陽王禧謀反賜死六月丁亥考諸州刺史加以黜陟秋七月乙巳蟬蠕犯塞乙未東豫州刺史田蒞宗破蕭寶卷將黃天賜於赤亭辛酉大赦天下壬戌車騎將軍儀同三司王肅薨九月丁酉發畿內男女五萬人築京師三百二

十三坊四旬而罷己亥立皇后于氏乙卯免壽春營戶爲揚州民冬十月丁卯吐谷渾國遣使朝獻辛未蕭寶卷零陵戍主華侯率戶內屬十有一月丙申以驃騎大將軍穆亮爲司空丁酉大將軍北海三詳爲太傅領司徒壬寅改築圓丘於伊水之陽乙卯仍有事焉十有二月高麗國遣使朝貢是月寶卷直後張齊殺其主寶卷降蕭衍衍克建業

三年春二月戊寅詔曰自比陽旱積時農民廢殖寤言增愧在予良多申下州郡有骸骨暴露者悉可埋瘞三月魯陽蠻反蕭寶卷弟建安王寶寅來降夏四月詔撫軍將軍李崇討魯陽反蠻是月蕭衍又廢其主寶融而僭立自稱曰梁閏月丁巳司空穆亮薨五月揚州小峴戍主党法宗襲蕭衍大峴戍破之擒其龍驤將軍邾菩薩送之京師秋七月癸酉于闐國遣使朝獻詔加文官從征顯

達宿衛者二階閑散者一階八月癸卯蕭寶融鎮南大將軍江州刺史陳伯之遣使請降乙卯以前太傅平陽公丕爲三老九月丁巳車駕行幸鄴丁卯詔使者弔殷比干墓戊寅閱武於鄴南庚辰武興國世子楊紹先遣使朝獻冬十月庚子帝親射遠及一里五十步羣臣勒銘於射所甲辰車駕還宮十有一月巳卯詔京洛兵蕪歲踰十紀先皇定鼎舊都惟新魏曆翦掃榛荒勦茲雲構鴻功茂績規模長遠今廟社乃建宮極斯崇便當以來月中旬蠲吉徙御仰尋遺意感慶交衷旣禮盛周宣斯于之制事高漢祖壯麗之儀可依典故備茲考告以稱遐邇人臣之望十有二月戊子詔曰民本農桑國重蠶籍桑盛所憑冕織攸寄比京邑初基耕桑暫缺遺規往宜必祇修今寢殿顯成移御維始春郊無遠拂羽有辰便可表營下畝開設宮壇秉耒援筐躬勸億兆壬寅饗羣臣于太極前殿賜布帛有差以初成也甲辰揚州破蕭衍將張翥之斬級二千是歲疏勒屬賓婆羅捺烏菟阿唵陀羅婆不輪陀拔羅弗波女提斯羅嚩舍伏耆奚那太羅槃烏稽悉萬斤朱居槃訶盤陀撥斤厭味朱沱洛南天竺持沙那斯頭諸國並遣使朝貢河州大饑死者二千餘口

四年春正月乙亥車駕藉田於千畝梁州氏楊會反詔行梁州事楊椿左將軍羊祉討之三月巳巳皇后先蠶於北郊庚辰揚州破蕭衍將於陰山斬其龍驤將軍吳道爽等數千級夏四月癸未朔以蕭寶寅爲鎮東將軍東揚州刺史封丹陽郡開國公齊王庚寅南天竺國獻辟支佛牙戊戌詔曰酷吏爲禍綿古同患孝婦淫刑東海焦壤今不雨十旬意者其有冤獄乎尚書鞠京師見囚務盡聽察之理巳亥帝以旱減膳徹懸辛丑澍雨大洽五月甲戌楊椿

羊祉大破反氏斬首數千級六月壬午朔封皇弟悅爲汝南王丙戌發冀定瀛相并濟六州二萬人馬千匹增配壽春秋七月乙卯三老平陽公元丕薨庚午詔還收鹽池利以入公辛未以彭城王勰爲太師八月庚子以吏部尚書元英假鎮南將軍攻蕭衍義陽勿吉國貢楮矢辛丑行幸河南城離宮冬十有一月壬子揚州大破蕭衍軍斬其徐州刺史潘佃擒司馬明素己未以武興國世子楊紹先爲其國王癸亥詔尚書左僕射源懷撫勞代都北鎮隨方拯恤乙亥鎮南將軍元英大破蕭衍將吳子陽於白沙擒斬千數十有二月庚寅詔鎮南將軍李崇討東荆反蠻丙申詔曰先朝制立軌式庶事惟允但歲積人移物情乖惰比或擅有增損廢墜不行或守舊遺宜時有舛妨或職分錯亂互相推委其下百司列其疑闕速以奏聞癸卯蕭衍梁州刺史平陽縣開國侯翟遠徐州刺史永昌縣開國侯陳虎牙降

正始元年春正月庚戌江州刺史曲江公陳伯之破蕭衍將趙祖悅於東關丙辰東荆州刺史楊大眼大破羣蠻樊季安等丙寅大赦改年二月戊子蕭衍將姜慶真襲陷壽春外郛州軍擊走之丁酉揚州統軍劉思祖大破衍衆於邵陽擒其冠軍將軍邵陽縣開國侯張惠紹驍騎將軍祁陽縣開國男趙景悅等十將斬獲數千級三月壬申元英破衍將王僧炳於樊城夏四月辛卯高麗國遣使朝獻五月丁未朔太傅北海王詳以罪廢爲庶人六月以旱徹樂減膳癸巳詔曰朕以匪德政刑多舛陽旱歷旬京甸枯瘁在予之責夙宵疚懷有司可循案舊典祇行六事罔固寃滯平處決之庶尹廢職重加脩舉鰥寡困窮在所存恤役賦殷煩咸加蠲省賢良謹直以禮進之貧殘佞諛時加屏黜男女怨曠務令媾會稱朕

意焉甲午帝以旱親薦享於太廟戊戌詔立周旦夷齊廟於首陽
山庚子以旱見公卿已下引咎責躬又錄京師見囚殊死已下皆
減一等鞭杖之坐悉皆原之秋七月癸丑蕭衍角城戍主柴慶宗
以城來降李崇大破諸蠻帥樊素安八月丙子元英破蕭衍將馬
仙琕於義陽詔洛陽令有大事聽面敷奏乙酉元英攻義陽拔之
擒送蕭衍冠軍將軍蔡靈恩等十餘將辛卯英又大破衍將仍清
三關下西封元英爲中山王戊戌西羌宋萬率戶四千內附九月
丙午詔緣淮南北所在鎮戍皆令及秋播麥春種粟稻隨其土宜
水陸兼用必使地無遺利兵無餘力比及來稔令公私俱濟也又
詔諸州蠲停徭役不得橫有徵發甲子詔中山王英所執蕭衍冠
軍將軍監司州事蔡靈恩等隨才擢敘乙丑蕭衍霍州刺史田道
龍義州刺史張宗之遣使內附蠕蠕犯塞詔左僕射源懷討之冬

十月乙未詔曰羣官白衣募吏十有一月戊午詔曰古之哲王勅
業垂統安民立化莫不崇建膠序開訓國胄昭宣三禮崇明四術
使道暢羣邦風流萬宇自皇基徙構光宅中區軍國務殷未遑經
建靖言思之有慙古烈可勅有司依漢魏舊章營繕國學十有二
月丙子以苑牧公田分賜代遷之戶已卯詔羣臣議定律令已亥
行幸伊闕閏月癸卯蕭衍行梁州事夏侯道遷據漢中來降假
尚書邢巒鎮西將軍率衆以赴之乙丑驃騎大將軍高陽王雍爲
司空尚書令廣陽王嘉加儀同三司

二年春正月丙子以宕昌國世子梁彌博爲其國王鄧至國遣使
朝貢二月梁州民反絕漢中運路刺史邢巒頻大破之夏四月己
未城陽王鸞薨乙丑詔曰任賢明治自昔通規宣風贊務實惟多
士而中正所銓但存門第吏部彝倫仍不才舉遂使英德罕昇司

務多滯不精厥選將何考陟八座可審議往代貢士之方擢賢之體必令才學並申資望兼致丙寅以仇池氏叛詔光祿大夫楊椿假平西將軍率衆以討之邢巒遣統軍王足西伐頻破蕭衍諸軍遂入劔閣執行輔國將軍范始男送京師五月辛巳氏賊口虎率衆降六月己丑詔曰先朝勲臣或身罹譴黜子孫沉滯或宦途失次有替舊流因而弗採何以獎勵言念前績情有親疎宗及庶族祖曾功績可紀而無朝官有官而才堪優引者隨才銓授甲寅蕭衍冠軍將軍李旼等置營始平郡東涪水之北王足逆擊敗之斬衍冠軍將軍張湯輔國將軍馬市寧朔將軍李當葵見祖輔國將軍馮文豪龍驤將軍何營之等甲子詔尚書李崇太府卿于忠散騎常侍游肇諫議大夫郗美崇忠使持節並兼侍中羨兼黃門俱爲大使糾斷外州畿內其守令之徒咎失彰露者即便施決州鎮

重職聽爲表聞乙丑蕭衍冠軍將軍王旻胤輔國將軍魯方達等攻竹亭王足大破之斬其輔國將軍王明達龍驤將軍張芳熾丁卯揚州刺史薛真度大破蕭衍將王超宗俘斬三千級戊辰蕭衍將魯方達屯戍新城足又遣統軍盧祖遷等擊敗之斬衍冠軍將軍楊伯仁寧朔將軍任安定秋七月甲戌詔曰朕纂馭寶曆於今七載德澤未敷鑒不燭遠人之冤瘼所在猶滋而糾察之獄未暢于下賢愚靡分皂白均貫非所以革民耳目使善惡勵心今分遣大使省方巡檢隨其愆負與風響相符者卽加糾黜以明雷霆之威以申旄軒之舉因以觀風辨俗採訪功過褒賞賢者糾罰淫慝理窮恤弊以稱朕心戊子王足擊破蕭衍軍斬其龍驤將軍喻增暉寧朔將軍庫保壽輔國將軍魯天惠建武將軍王文標王足逼涪城壬辰蕭衍巴西太守庾域冠軍將軍統軍主李旼等逆戰足

擊破之俘斬千數八月壬寅詔中山王英南討襄沔庾戌王足遣
統軍紀洪雅盧祖遷等攻破衍軍斬其秦梁二州刺史魯方達等
十五人壬子王足又遣統軍盧祖遷等擊破衍軍斬其都督冠軍
將軍梓潼縣開國子王景胤劉達等二十四將軍甲寅揚州擊衍
將姜慶真於羊石破之是月衍沔東太守田青喜率郡七縣三十
一戶萬九十內附九月己巳揚州刺史元高擊破衍湘州刺史楊
公則等斬獲數千冬十有一月戊辰朔武興國王楊紹先叔父集
心謀反詔光祿大夫楊椿討之王足圍涪城益州諸郡戍降者十
一三民送編籍者五萬餘戶既而足引軍而退十有二月庚申又
驃騎大將軍源懷慎令討武興反氏

太平春正月丁卯朔皇子生大赦天下壬申梁秦二州刺史邢巒
反氏賊兒武興蕭衍冀州刺史桓和入寇南青州州軍擊走之

秦州民王智等聚衆二千自號王公尋推秦州主簿呂苟兒爲主
年號建明己卯楊集起兄弟相率降二月丙辰詔曰昔虞戒而從
昌言屢進周任諫輔主闕必箴朕仰續鴻基伏膺寶曆思康庶績
一日萬幾是以側望忠言虛求讜直而良策弗進規畫無聞豈所
謂弼諧元首匡救不逮者乎可詔王公已下其有嘉謀深圖直言
忠諫利國便民矯時厲俗者咸令指事陳奏無或依違戊午詔右
衛將軍元麗等討呂苟兒乙丑平南將軍陳伯之破蕭衍徐州刺
史昌義之於梁城是月衍將蕭昞率衆五萬寇淮陽三月己巳以
戎旅人興詔罷諸作己卯詔荊州刺史趙怡平南將軍奚康生赴
淮陽樂良王長命坐殺人賜死國除戊子名皇子曰昌庚寅平南
將軍曲江縣開國公陳伯之自梁城南奔夏四月乙未詔罷鹽池
禁甲辰詔遣使者巡慰北邊酋庶庚戌以中山王英爲征南將軍

都督楊徐二道諸軍事指授邊將蕭衍江州刺史王茂先寇荊州
一於河南城詔平南將軍楊大眼討之辛酉大破之斬其輔國將
軍王花首虜二千餘進攻河南城茂先逃潰追奔至於漢水拔其
五城將軍宇文福略衍司州俘獲千餘口而還五月乙丑朔詔尚
書拯義陽初附之戶內寅詔曰掩骼埋胔古之令典順展脩令朝
之恒式今時澤未降春稼已旱或有孤老餒疾無人贍救因以致
死暴露溝塹者洛陽部尉依法棺埋壬申蕭衍將張惠紹入寇陷
宿豫乙亥衍將蕭容陷梁城辛巳衍將韋叡陷合肥城壬午詔尚
書元遙率衆南討癸未以秦隴未平詔征西將軍于勁節度諸軍
已丑衍將又陷羊石霍丘二城六月辛丑又陷小岷戍乙巳安西
將軍元麗大破秦賊斬賊帥王智五人梟首六千丁未假平南將
軍奚康生破蕭衍將張惠紹斬其徐州刺史宋黑丁巳詔尚書邢
巒出討徐竟秋七月丙寅衍將桓和寇孤山陷固城庚辰元麗大
破秦賊降呂苟兒及其王公三十餘人秦涇二州平戊子中山王
英大破衍徐州刺史王伯敖於陰陵斬其將二十五人首虜五千
有餘己丑詔發定冀瀛相并肆六州十萬人以濟南軍八月壬寅
安東將軍邢巒破蕭衍將桓和於孤山斬首萬餘級將軍元恒別
克固城斬衍冠軍將軍桓方慶統軍畢祖朽別克蒙山斬衍龍驤
將軍矯遵儀等斬賊及赴泝死者四千餘人兗州平己酉詔平南
將軍安樂王詵督後發諸軍以赴淮南壬戌曲赦涇秦岐涼河五
州九月癸酉邢巒大破衍軍於宿豫斬其大將藍懷恭等四十餘
人張惠紹棄宿豫蕭昞棄淮陽南走追斬數萬級徐州平己丑中
山王英大破衍軍於淮南衍中軍大將軍臨川王蕭宏尚書右僕
射柳惔徐州刺史昌義之等棄梁城沿淮東走追奔次於馬頭衍

冠軍將軍戍主朱思遠棄城遁擒逆將四十餘人斬獲士卒
五萬有餘英遂攻鍾離高麗國遣使朝貢蕭衍遣將士卒三萬寇
義陽丁酉夜遁走郢州刺史婁悅追擊破之戊申蠕蠕國遣使朝
貢已未征虜將軍趙遐大破衍衆於瀋城桑坪十有一月甲子帝
爲京兆王愉情河王懌廣平王懷汝南王悅講孝經於式乾殿庚
寅詔曰往歲隴右扇逆合境不民其中猶有卒能自守無豫爰亂
疾風知勁良在可嘉尚書可甄量報賞以表誠義是月梁州再破
反獠

四年春三月丙午吐谷渾客昌國並遣使朝獻已未勿吉國貢梃
矢三月丙子疊伏羅國遣使朝貢夏四月戊戌鍾離大水中山王
英敗績而還壬寅吐谷渾鳩磨羅阿拔磨拔切磨勒悉萬斤諸國
並遣使朝獻夏六月己丑朔詔曰高祖德格兩儀明並日月播文

教以懷遠入調禮學以旌雋造徙縣中區光宅天邑總霜露之所
均一姬卜於洛溪戎繕兼興未遑儒教朕纂承鴻緒君臨寶曆思
模聖規述遵先志今天平地寧方隅無事可勅有司準訪前式置
國子立太學樹小學於四門丙午蕭衍龍驤將軍馮翊太守宇文
子生等七郡相率內附丁未社蘭達那羅舍彌比羅直諸國並遣
使朝獻秋八月辛卯契丹國遣使朝獻已亥中山王英齊王蕭寶
夤坐鍾離敗退並除名爲民庚子庫莫奚客昌吐谷渾諸國遣使
朝獻辛丑敦煌民饑開倉賑恤九月己未詔曰朕秉曆承天履年
將紀徙正宮極歲浹歸餘台懿茂親祇勒已久列司英彥肅績未
酬非所謂有功見知賞以時及其以司空高陽王雍爲太尉尚書
令廣陽王嘉爲司空百官悉進位一級庚申夏州長史曹明謀反
伏誅甲子開斜谷舊道疏勒車勒阿駒南天竺婆羅等諸國遣使

朝獻丙戌司州民饑開倉賑恤閏月甲午禁大司馬門不得車馬
出入冬十月丁巳高麗半社悉萬斤可流伽比沙疏勒于闐等諸
國並遣使朝獻丁卯皇后于氏崩戊辰疏勒國遣使朝貢庚午淮
陽太守安樂以城南叛辛未嚙噠波斯渴槃陀渴文提不那杖忸
杖提等諸國並遣使朝獻乙酉葬順皇后於永泰陵十有一月丁
未禁河南畜牝馬自碣石至於劔閣東西七千里置二十二都尉
巴西阿與陀呵羅槃陀跋吐羅諸國並遣使朝獻十有二月戊午
詔兵士鍾離沒落者復一房田租三年辛酉特那杖提莎鉢離阿
失勒摩致鉢諸國遣使朝貢甲子蠕蠕高車民他莫狐率部來降
丁丑鉢輪波利伏佛肩善乾達諸國遣使朝貢

永平元年春正月戊戌賴川太守王神念奔於蕭衍二月辛未勿
吉南天竺國並遣使朝獻三月戊子皇子昌薨己亥斯羅阿陀比

羅阿夷文多婆那伽伽師達于闐諸國並遣使朝獻丙午以去年
旱儉遣使者所在賜恤夏四月阿伏至羅國遣使朝貢五月癸未
高麗國遣使朝獻辛卯帝以旱故減膳撤懸六月壬申詔曰慎獄
重刑著於往誥朕御茲寶曆明鑒未遠斷決煩疑實有攸愧可依
洛陽舊圖修聽訟觀農隙起功及冬令就當與王公卿士親臨錄
問冬西高車國遣使朝貢秋七月辛卯高車契丹汗畔斃賓諸國
並遣使朝獻甲午以夫人高氏爲皇后乙未詔曰察獄以情審之
五聽枷杖小大各宜定準然比廷尉司州河南洛陽河陰及諸獄
官鞠訊之理未盡矜恕掠拷之苦每多切酷非所以祗憲量衷慎
刑重命者也推濫冤枉良軫於懷可付尚書精檢枷杖違制之由
斷罪聞奏八月癸亥冀州刺史京兆王愉據州反乙丑假尚書李
平鎮北將軍行冀州事以討之丁卯大赦改年庚午吐谷渾庫莫

奚國並遣使朝貢九月辛巳朔李平大破元愉於草橋丙戌復前
中山王英本封壬辰蠕蠕國遣使朝貢定州刺史安樂王銓大破
元愉於信都北戌戌殺侍中太師彭城王勰辛丑詔赦冀州民雜
工役爲元愉所誑誤者其能斬獲逆黨別加優賞癸卯李平克信
都元愉北走斬其所署冀州牧韋超右衛將軍陸雅尚書僕射劉
子直吏部尚書崔肫等統軍叔孫頭執愉送信都羣臣請誅愉帝
弗許詔送京師冀州平唐子郢州司馬彭珍治中督榮祖等謀叛
潛引蕭衍衆入義陽郢州刺史婁悅擊走之詔將軍胡季智屈祖
等南赴義陽三關戌主侯登陽鳳省等以城南叛婁悅嬰城固守
遣中山王英督步騎三萬以赴之冬十月丁巳詔復故北海王詳
本封燕王禮豫州彭城人白早生殺刺史司馬悅據城南叛蕭
衍遣將齊苟仁等四將以助之詔尚書邢巒行豫州事督將軍崔
暹率騎討之丙子邢巒大破早生及苟仁軍於鮑口丁丑前宿豫
戌主成安樂子景儁殺宿豫戌主嚴仲賢以城南叛十有一月庚
寅詔安東將軍楊椿率衆四萬攻宿豫十有二月己未邢巒克懸
瓠斬白早生擒齊苟仁等俘蕭衍卒三千餘人分賜王公已下癸
亥中山王英破衍將於楚城擒衍寧朔將軍張疑等郢州刺史婁
悅破衍將馬仙琕於金山壬申漢東蠻民一萬七千戶相率內附
丙子高麗國遣使朝貢是歲高昌國王麴嘉遣其兄子私署左衛
將軍孝亮奉表來朝因求內徙乞師迎接

二年春正月蕭衍遣王神念寇南兗詔輔國將軍長孫稚假平南
將軍爲都督率統軍邢虬等五軍以討之丁亥胡密步就磨怛密
藥是悉萬斤辛丑那越拔怛諸國並遣使朝獻壬辰噉薄知國
遣使來朝貢白象一乙未高昌國遣使朝貢丙申中山王英進逼

蕭衍長薄戍戍宵潰殺傷千數丁酉拔武陽關擒衍雲騎將軍
松滋縣開國侯馬廣冠軍將軍遷陵縣開國子彭瓮生驍騎將軍
當陽縣開國伯徐元季等二十六將俘獲七千餘人進攻黃峴西
關衍將馬仙琕棄西關李元履棄黃峴遁走是月涇州沙門劉惠
汪聚衆反詔華州刺史奚康生討之二月乙卯詔曰比軍役頻興
仗多毀敗在庫戎器見有無幾安不忘危古人所戒五兵之器事
須充積經造既殷非衆莫舉今可量造四萬人雜仗三月癸未磨
五羅阿瞿社蘇突閣地伏羅諸國並遣使朝獻夏四月己酉詔以
武川鎮饑開倉賑恤甲子詔曰聖人濟世隨物汗隆或正或權理
無恒在先朝以雲駕甫遷嵩基始構河洛民庶徙舊未安代來新
宅尚不能就伊闕西南羣蠻填聚沔陽賊城連邑作戍蠡爾愚巴
心未純款故暫抑造育之仁權緩肅姦之法今京師天固與昔不

同楊郢荆益皆悉我有保險諸蠻罔不歸附商洛民情誠倍往日
唯樊襄巴南仁乖道政被拘隔化非民之咎而無賴之徒輕相劫
掠屠害長善離人父兄衍之爲酷實亦深矣便可放彼掠民示其
大惠捨此殘賊未令之愆并勅緣邊州鎮自今已後不聽境外寇
盜犯者罪同境內若州鎮主將知容不糾坐之如律五月高麗國
遣使朝獻辛丑帝以旱故減膳徹懸禁斷屠殺甲辰幸華林都亭
親錄囚徒犯死罪已下降一等六月高昌國遣使朝獻辛亥詔曰
江海方同車書宜一諸州軌轍南北不等今可申勅四方使遠近
無二秋七月癸未契丹國遣使朝獻八月丁未鄧至國遣使朝獻
戊申以鄧至國世子像覽蹄爲其國王高昌勿吉庫莫奚諸國並
遣使朝獻九月辛巳封故北海王子顥爲北海王壬午詔定諸門
闔名冬十月癸丑以司空廣陽王嘉爲司徒庚午郢州獻七寶牀

詔不納十有一月甲申詔禁屠殺含孕以爲永制己丑帝於式乾殿爲諸僧朝臣講維摩詰經十有二月詔曰五等諸侯比無選式其同姓者出身公正六下侯從六上伯從六下子正七上男正七下異族出身公從七上侯從七下伯正八上子正八下男從八上清修出身公從八下侯正九上伯正九下子從九上男從九下可依此敘之疊伏羅弗菩提朝臨咤波羅諸國並遣使朝獻三年春二月丙午高昌鄧至國並遣使朝獻壬子秦州沙門劉光秀謀反州郡捕斬之癸亥秦州隴西羌殺鎮將趙儁阻兵反叛州軍討平之三月丙戌皇子生大赦天下高麗吐谷渾宕昌諸國並遣使朝獻夏四月平陽郡之禽昌襄陵二縣大疫自正月至此月死者二千七百三十人五月丁亥詔以冀定二州旱儉開倉賑恤六月壬寅詔重求遺書於天下丁卯名皇子曰諱閏月己亥吐谷

渾高麗契丹諸國各遣使朝貢秋七月己未吐谷渾國遣使朝貢八月己卯勿吉國遣使朝貢九月壬寅烏蕞伽秀沙尼諸國並遣使朝獻丙辰高車別帥可略汗等率衆一千七百內屬冬十月辛卯中山王英薨丙申詔曰朕乘乾御曆年周一紀而道謝擊壤教慙刑厝至於下民之氣鰥疾苦心常愍之此而不恤豈爲民父母之意也可勅太常於閑敞之處別立一館使京畿內外疾病之徒咸令居處嚴勅醫署分師療治考其能否而行賞罰雖齡數有期修短分定然三疾不同或賴針石庶秦扁之言理驗今日又經方浩博流傳處廣應病投藥卒難窮究更令有司集諸醫工尋篇推簡務存精要取三十餘卷以班九服郡縣備寫布下鄉邑使知救患之術耳戊戌高車龜茲難地那竭庫莫奚等諸國並遣使朝獻十有二月己卯高麗比沙杖國遣使朝獻辛巳江陽王繼坐事除

名甲申詔於青州立高祖廟殿中侍御史王敞謀反伏誅

四年春正月丁巳汾州劉龍駒聚眾反詔諫議大夫薛和率眾討之甲子阿悅隨不數羅國並遣使朝獻二月壬午青齊徐兗四州民饑甚遣使賑恤三月癸卯婆比幡彌烏婁比地乾達諸國並遣使朝獻壬戌司徒廣陽王嘉薨夏四月琅邪民王萬壽斬蕭衍輔國將軍瑯邪東莞二郡太守劉晰首以朐山來降徐州刺史盧昶遣琅邪戌主傅文驤率眾據之甲戌薛和大破山胡蕭衍遣其鎮北將軍張稷及馬仙琕寇朐山詔盧昶率眾赴之五月己亥遷代京銅龍置天淵池丙辰詔禁天文之學六月乙亥乾達阿婆羅達舍越伽使密不流沙諸國並遣使朝獻秋七月辛酉吐谷渾契丹國並遣使朝獻八月辛未阿婆羅達舍越伽使密不流沙等諸國並遣使朝獻癸巳勿吉國獻楷矢九月甲寅蕭衍九山戌主苟仁以戌來降噉噠朱居槃波羅莫伽陀移婆僕羅俱薩羅舍彌羅樂陀等諸國並遣使朝獻冬十月丁丑婆比幡彌烏婁比地乾達等諸國並遣使朝獻十一月甲午宕昌國遣使朝獻己亥詔李崇奚康生等治兵壽春以分朐山之寇戊申難地伏羅國並遣使朝獻朐城陷盧昶大敗而還十有二月壬申詔曰進善退惡治之通規三載考察政之明典正始二年以來于今未考功過難齊寧無昇降從景明二年至永平四年通考以聞戊子大羅汗婆來伽國遣使朝獻

延昌元年春正月乙巳以頻水旱百姓饑弊分遣使者開倉賑恤戊申疏勒國遣使朝獻丙辰以車騎大將軍尚書令高肇爲司徒公光祿大夫清河王懌爲司空司州牧廣平王懷進號驃騎大將軍儀同三司二月辛卯朔渴槃隨國遣使朝獻甲午州郡十一大

水詔開倉賑恤以京師穀貴出倉粟八十萬石以賑貧者己未安樂王詮薨夏四月詔以旱故食粟之畜皆斷之下卯詔曰遷京嵩縣年將二紀虎闌闐唱演之音四門絕講誦之業博士端然虛祿歲祀貴遊之胃歎同子矜靖言念之有兼愧慨可嚴勅有司國子學孟冬使成太學四門明年暮春令就戊辰以早詔尚書與羣司鞠理獄訟詔河北民就穀燕恒二州辛未詔饑民就穀六鎮丁丑帝以旱故減膳撤懸癸未詔曰肆州地震陷裂死傷甚多言念毀沒有酸懷抱亡者不可復追生病之徒宜加療救可遣太醫折傷醫并給所須之藥就治之乙酉大赦改年詔立理訴殿申訟車以盡冤窮之理五月辛卯疏勒及高麗國並遣使朝獻丙午詔天下有粟之家供年之外悉貸饑民自二月不雨至於是晦六月壬申澍雨大洽戊寅通河南牝馬之禁己卯詔曰去歲水災今春炎旱

百姓饑餒救命靡寄雖經蠶月不能養續今秋輸將及郡縣期於責辦尚書可嚴勸諸州量民資產明加檢校以救艱弊庚辰詔出太倉粟五十萬石以賑京師及州郡饑民秋七月吐谷渾契丹國並遣使朝獻八月壬戌吐谷渾國遣使朝貢丁亥勿吉國貢楛矢冬十月乙亥立皇子詔承為皇太子是月嘸達于闐高昌及庫莫奚諸國並遣使朝獻十有一月丙申詔曰朕運承天休統御宸宇太子體藉靈明肇建宮華明兩既孚三善方洽宜澤均率壤榮汎庶胤其賜天下為父後者爵一級孝子順孫廉夫節婦旌表門閭量給粟帛十有二月己巳詔守宰為御史所彈遇赦免者及考在中第皆代之

二年春正月戊戌帝御申訟車親理冤訟高麗國遣使朝獻二月丙辰朔賑恤京師貧民甲戌以六鎮大饑開倉賑贍己卯太尉高

陽王雍進位太保庚辰蕭衍郁州民徐玄明等斬逆衍鎮北將軍
青冀二州刺史張稷首以州內附詔前南兗州刺史樊魯率衆赴
之閏二月辛丑以苑牧之地賜代遷民無田者癸卯定奴良之制
以景明爲斷三月丙寅高昌國遣使朝獻是春民饑餓死者數萬
口夏四月庚子以絹十五萬匹賑恤河南郡饑民五月壽春大水
遣平東將軍奚康生等步騎數千赴之高麗國遣使朝獻六月乙
酉青州民饑詔使者開倉賑恤甲午曲赦揚州辛亥帝御申訟車
親理寃訟是夏州郡十三大水秋八月辛卯詔曰頃水旱平侵頻
年饑饉百姓窘弊多陷罪辜煩刑之愧朕用懼矣其殺人掠賣人
羣彊盜首及雖非首而殺傷財主曾經再犯公斷道路劫奪行人
者依法行決自餘恕死徒流已下各準減降庚戌嘯噓于闐樂施
及契丹庫莫奚諸國並遣使朝獻九月丙辰以貴族豪門崇習奢

侈詔尚書嚴立限級節其流宕是月勿吉吐谷渾鄧至國並遣使
朝貢冬十月詔以恒肆地震民多死傷蠲兩河一年租賦丁有
二月丙寅洛陽河陰二縣租賦乙口詔以恒肆地震民多罹災其
有貧乏及盡老幼單辛家無受復者各賜廩以接來稔高麗國遣
使朝獻

二年春二月詔曰肆州之俗多盜賊城縣鴈門郡原平縣並自
二年四月以來山陽地震于今不已告譴彰咎朕甚懼焉祇畏兢
兢若臨淵谷可恤瘼寬刑以容人罪三月關別將李世哲大破
羣蠻斬蕭衍龍驤將軍文思之文天生夏四月青州民饑辛巳開
倉賑恤乙巳上御申訟車親理寃訟六月南荊州刺史桓叔興大
破蕭衍軍於九山斬其虎旅將軍新豐縣開國子蔡令孫冠軍將
軍席世興貞義將軍藍次孫秋七月丙子勿吉國遣使朝貢八月

